

焦太史編輯國朝獻徵錄

焦太史編輯國朝獻徵錄卷之五十二目錄

南京工部一

尚書

甄庸

王永壽

王來

戴縉

胡拱辰

程宗

劉宣

馮貫

蕭禎

董越

李孟賜

韓重

陳清

張憲

李善

柴昇

洪遠

黃珂

叢蘭

崔文奎

吳廷舉

陳雍

張嶺

胡璜

何詔

楊麒

彭黠

王鈞

康太和

呂光洵

徐養正

魏尚純

徐拭

葉夢熊

目錄終

焦太史編輯國朝獻徵錄卷之五十二

南京工部一

尚書

南京工部尚書甄庸傳

實錄

南京工部尚書甄庸宛平縣人由戶部主事陞知府坐累罷復起爲監察御史陞工部侍郎再陞尚書居官和平無所可否宣德七年六月以考滿來朝

上憫其老特勅致仕

二十一年奉命成造冬夏衣給賜雲南官民生駱進等六十一人并玩球官生周魯美周第仍奏准自

後依時給賜不待奏請著爲令

南京工部尚書王永壽傳

實錄

南京工部尚書王永壽字延齡山西太原縣人正統丁巳以舉人任江西饒州府推官三載選爲廣四道監察御史嘗從征北虜凱還受賚巡按山東貴州及蘇松等處久之任工部右侍郎調南京工部歷三載陞本部尚書未幾調北京工部奉勅巡撫湖廣以安得人心尋命兼督軍務征銅鼓五開等處苗賊成功賜從一品俸天順初復調南京工部天順六年九月卒於官遣官祭葬永壽長身多髯益淳謹寡默之士云

南京工部尚書王來傳

南京工部尚書兼大理寺卿王來字原之浙江慈谿縣人由諸生魁鄉薦會試得乙榜授江西新建縣學教諭被薦擢監察御史巡按直隸蘇松常鎮諸郡風采凜然尋奉命考覈守令而下貪暴者望風引去正統初少師楊士奇薦擢山西左叅政兵部侍郎于謙巡撫山西言其廉明剛正練達政體可寘近密當道者沮之調廣東左叅政秩滿陞河南布政使景泰初陞都察院左副都御史巡撫河南湖廣北虜犯京師聞召卽率兵馳至衛輝以寇退引還尋陞都御史時

征勦湖廣苗賊命總督軍務縛其渠魁韋同烈等而
擬定其餘黨師還召見便殿慰勞之轉南京工部尚
書兼大理寺卿天順初致仕成化改元詔進一階成
化六年四月卒年七十六訃聞賜祭命有司營葬來
俾姿貌少儁邁不羣善詩有奇語臨事明達事無大
小面訊立斷其在山西時以嚴察爲治頗過於酷中
遭沮抑遂折節痛改爲政一以和平奉命宣力四方
所至以治辨稱

南京工部尚書戴縉傳

雷禮

戴縉字某廣東廣州府南海縣人成化丙戌進士擢
監察御史性行素不端及在臺不持風紀惟趨附權
勢以躡華要而名檢蕩然自丙申秋逆賊李子龍伏
誅後上銳意欲知外事顧近侍太監汪直年小便
黠乃命選錦衣官校善刺事者百餘人另置廠於靈
濟宮前號西廠緝事士民凜凜受禍不敢言十三年
兵部尚書項忠等首疏其過惡入奏大學士商輅力
主之上怒罷廠命汪直回理司設監事縉以九年
滿不得陞首媚汪直爲之鷹犬陳言汪所行皆公不

宜華罷汪卽奉命仍舊刺事遂陞縉尚寶司少卿於
是大學士商輅等相繼去位縉紳臥不安席而汪益
恣肆無忌威擬至尊流毒無窮以致御史馮瓘汪億
等不恥效尤亦進言汪所行不惟可爲今日法實可
爲萬世法傳聞四方無賢愚貴賤皆唾罵之以縉爲
罪魁也十四年汪直薦縉陞都察院右僉都御史十
五年又薦陞右副都御史吏部尚書尹旻俱承望汪
旨不敢違十七年又薦陞右都御史代王越掌院事
在臺中益甘心直黨綱紀掃地十九年以公議不容
又南京尚書久不設督陞南京工部尚書在部洪恣

希世無所願惟本年汪直失勢臺諫交劾黜爲民

南京工部尚書胡拱辰傳

實錄

南京工部尚書胡拱辰字共之浙江淳安縣人正統
己未進士授黟縣知縣有惠政擢監察御史嘗疏入
事皆切中時弊 英廟北狩拱辰屢疏以選將保邦
修德弭災爲言尋陞左叅政轉左右布政使歷左右
副都御史南京工部尚書成化中儲位尚虛拱辰率
諸大臣疏乞早定國本拱辰平生清謹所至以興利
除害爲務在貴州兩廣四川督勦叛夷爲都御史時
提督操江勞績可紀者甚多年七十懇乞致仕而歸
弘治辛酉 孝廟特賜之月廩歲隸 今上閱極又

遺官以璽書存問賜隸廩有加焉正德三年正月卒
贈太子少傅謚莊懿賜葬祭如例拱辰卒時年九十
三大老退居林下享有榮壽若拱辰代不多見人以
之方諸魏文靖云

資善大夫南京工部尚書常熟程公宗神道碑

徐溥

弘治己酉南京工部尚書程公致仕還家後三年以病卒年六十有七蘇之常熟人也於是守臣以公訃聞事下禮部謂當遣官祭葬如卹典上允之公諱宗字源伊姓程氏世有隱德至公始大發以宣德丙午生少入邑庠學業有聲登景泰辛未進士初授刑部主事階員外郎擢吉安知府在刑部時治獄詳慎紳有才名時有大臣退休者當英宗復位之初畏罪自盡怨家誣其子謀殺久不能決法司奏遣公往

訊所誣遂白吉安素號難治吏書奸弊日出每以訟牒自裁獄成特使書之奸弊悉去至今郡人論作郡者以公首稱丁父憂服闋改知其定以病未赴吉安之民知之相率走闕下乞公復任至則改知武昌矣踰二年擢四川布政司左叅政進陝西右布政使再轉左布政使所至皆有政績民多頌之 朝廷知公可用特擢都察院右副都御史治院事尋以陝西缺巡撫卽以命公適邊境多事偕總兵率師征洮川西番滿松等族及往來慶陽榆林調度兵食邊境無事再丁母憂服闋未上會木邦酋長罕乞法孟養恩六

與孟密曩罕弄母子累歲相讐殺雲南守臣奏乞調
兵討之朝議以爲不便宜遣大臣如程某者往諭乃
卽其家賜以璽書而行公被勅旨諭之折其辯說及
見曩弄復責其擅相攻擊之罪皆頓首服乃以具奏
始設孟密安撫司以材察歸未邦不相統攝而西南
遂無事矣 朝廷嘉之轉公左副都御史加俸一級
仍巡撫雲南贊理軍務久之公爲刑部右侍郎尋轉
左侍郎以尚書缺署掌部事能律以法部中肅然九
年考滿始拜南京工部尚書加俸一級公至是雖老
益勤凡工役材用計度精詳無所濫費人方望公久

任則致仕而歸且卒矣公持身之謹待人之恕人皆知之嘗預同考會試得士爲多有撫夷集藏于家

南京工部尚書劉公宣傳

王時槐

劉宣字紹和安福人早孤力學補父戍役于盧龍景
泰庚午以儒士舉順天鄉試第一明年登進士選翰
林庶吉士授編修累官南工部尚書宣重厚優容喜
愷不見於色居太常十一年絕無愆望爲南司成待
諸生誠意藹然教有條式因其材而勉進之琉球諸
國遣子弟來就學人曰行故事爾奚庸教宣曰夷狄
慕中國來學不盡心以誨迪之是過抑其良心也外
國生俱感悅厚贖金以獻者再固却之外國生以聞
被命宣受母辭宣乃受慶成宴坐次未定僉曰須

決之劉太常宣歷舉舊制以對遂爲定規於言官往
來甚簡曰是非大臣親狎之地卒贈資政大夫謚文
懿宣制行務存大體惡輕改作常曰後生少年輕舉
妄動利未至而害先之國家何賴焉人以爲確論


資善大夫南京工部尚書龔吾馮公貫神道碑

徐溥

公諱貫字大用保定蠡吾人也曾祖守道元西臺御史祖彥章洪武中人材任富平縣主簿考吉以公貴贈大理寺卿公少起田畝年十八始知自奮於學正統己巳之變士民驚潰失業公誦讀不廢及領鄉薦入國學貧無膏燭夜每挾冊隨月光以讀晦則燎薪續明其勤苦如此登天順甲申進士授監察御史嘗出巡邊關按州縣搜吏弊索民隱貪廉才頑多見褒黜成化中上疏言時事曰慎爵賞卹窮民處流移修

兵政廣儲蓄禁盜賊平刑獄息邊患節冗費重憲職
數事 上嘉納之及掌三法司事治山西妖民及劾
兵部大臣不法事聞者肅然九年進大理寺右寺丞
轉左寺丞進少卿不數年遂擢都察院右副都御史
又改大理寺卿法律精明持心仁恕嘗曰大理平天
下獄獄之不平咎在誰執故當奏獄必反覆訊鞫無
憾而後已每廷議參酌得宜其言載在條例有司至
今遵行之嘗應詔舉所知衆稱得人弘治六年拜南
京工部尚書九年以疾乞致仕詔可且命馳驛以歸
抵家一月而卒九月二日也壽六十有四公魁岸美

稱爲人詳審沉靜而有謀謨度量汪如莫窺其際在
大理嘗承詔會同三法司錄囚有餽羊上尊之賜會
勘肅府汾川王承奉及廷試爲讀卷官皆有寶鏤之
賜弘治改元 上太皇太后及皇后徽號誥封二代
皆三品又有白金文綺之賜及卒 上遣官諭祭治
其喪葬



資善大夫南京工部尚書蕭公禎神道碑

吳寬

公諱禎字彥祥姓蕭氏世家吉安之泰和爲著姓入國朝仕者不絕然無甚顯者公幼失怙生有高資能自奮於學期必取科第遊學於外族人有所隸尺籍蜀中者往依之學成弟子多從受業然益困無所遇倫然西歸舟行峽江隅墮深淵中自分必死矣忽若有物扶其足而起適得漂櫓負而登岸人異其事謂公後當顯竟以儒士舉於鄉天順甲申登進士第成化乙酉授南京刑部貴州司主事己丑陞湖廣司員

外郎治獄明決爭訟者一訊輒得其情據律剖斷庭無留獄人皆稱之壬辰擢湖廣按察司僉事分巡一道明決如在刑部時所至郡縣興舉廢墜尤好獎進人才敦勸民俗不專以簿書爲事俄苗寇竊發詔出兵剿之文武大臣或不相能公適以事在軍中曰自古未有大臣不和而能成事者況用兵又事之大者乎爲反覆開解大臣感悟寇一平公當紀功則有以婦女首級徼功者辨其僞斥之及奏捷加四品俸吉王建國長沙公復督工役一時夫匠被人擾害者賴公以安巡按御史累奏公治績辛丑擢本司副使

丙午再擢按察使於是蒞湖廣者歲久治績愈著名益起明年遂遷河南左布政使至則宣上德究民隱尤不肯以公錢曲奉權貴人人以爲難戊申爲今

上初年會陝西缺大臣巡撫朝廷卽以公爲都察院右副都御史賜勅得便宜行事陝西當凶荒之餘民初復業公加意安輯流移者至乃內務蓄積外爲備禦兵民晏然西方無事歲當慮囚得可矜疑者悉置輕典奏上囚多免枉死公作全命錄以著朝廷欽恤之意然是時一裨帥犯法素有聲勢爲請托者多卒論如律復以平寇功有文綺寶鈔之賜辛亥遷南京

工部右侍郎甲寅改刑部丁巳始有工部尚書之命
南京爲舊都凡壇廟宮闕城垣橋道歲久漸圯修治
無虛歲公計夫匠量材物役用必當未嘗妄費權貴
人有乘時求利者往往無所得每土功告成輒蒙恩
賜上將久任公甫三年則公以老疾去而卒矣公
少時羅夫人憐其幼弱析與田產特厚後夫人卒公
悉讓還二兄取舊券焚之親黨若故刑部尚書劉公
廣衡而下率譽公以爲不可及公壯且貴痛念父母
不及祿養過塋域輒慟哭如初喪念叔祖志翁無後
塋域蕪廢爲修飾而歲祀之居家作敦本堂及置祭

田供合祀祖先之費至于處宗族待故舊其心無不歸於厚者若其歷官四十年田廬僅足服食不侈於物無所玩好公稍暇惟讀書賦詩而已

資政大夫南京工部尚書贈太子少保諡文僖

董公越墓志銘

李東陽

今天子右文圖治每軫念舊學侍從之臣倪文毅傅
文穆二公卹典特異比董文僖公訃聞命有司祭葬
如制而特贈爲太子少保文僖其賜諡也按董氏世
居贛之寧都曾祖諱子平隱於鄉祖諱吉義贈南京
禮部右侍郎考諱時謙累贈翰林院編修右春坊右
庶子而加贈如其祖祖妣某氏贈淑人而妣溫氏封
太孺人贈宜人加贈亦如之公諱越字尚矩生五歲
失怙爲母氏所鞠比弱冠極力共養以其暇學舉子

業補府學生天順己卯舉鄉貢試禮部輒不利卒業
國監攻苦力學雖敵巾垢服名隱起儕輩間成化己
丑進士及第初命爲編修乙未戊戌皆同考禮部時
稱得人丁內艱歸用禮喪事舉先世田業讓其兄睦
處宗鄙不以貴加人人無問疏戚貴賤皆樂與之親
有訟者懷金以請笑而却之亦不怨也九載考最進
侍讀癸卯典京闈鄉試甲辰直 東宮講讀丁未充
經筵講官尋以 登極恩進右庶子兼侍講會 朝
廷頒劄于朝鮮特命公奉使賜麒麟服以行至則宣
德意正王度餽贈無所受居三日而還乃作賦以紀

國俗他所題詠尤多國人毀諸梓以傳弘治己酉典
試南畿辛亥修 憲宗實錄成擢太常寺少卿兼侍
講學士壬子進講敷奏明暢義歸于正 上每爲注
聽資予尤數癸丑擢南京禮部右侍郎公博古典習
問本朝故事而職務清簡無絲自見大夫士議禮者
多取決焉三年考績京師時其子天錫已舉進士留
累月乃去拜南京工部尚書凡 上供服器藩王張
具暨都城內外土木之費日芻午不絕公應之綽然
有餘平生爲文章歌詩典雅優裕無煩雕琢至是猶
不廢著述積所得爲圭峰稿若干卷壬戌五月七日

以疾卒距其生宣德辛亥壽七十二公修眉長身骨
格清聳雄談健步老益彊力而性行恒固量度優遠
識者謂爲壽考之相不意其遽止此惜夫

資政大夫南京工部尚書南岡李公孟賜墓志

銘

劉玉

公諱孟賜字時雍別號南岡世爲睢之長岡里人祖諱都考諱斌歷渭南掖縣丞俱以公貴累贈都察院右副都御史南京工部尚書妣張氏繼岳氏俱夫人公以宣德壬子生于渭南官舍八歲入小學十五受尚書天順壬午中河南鄉試進大學取天下英俊爲麗澤交名籍甚會司成邢公被謗公率同列上書辯誼聲振一時成化壬辰登進士授戶科給事中癸卯盜擄大同值虜寇入邊危甚歸陳邊備十事所陳民

通鑑
都給
事

壯事著爲令甲辰使占城時占城爲安南所侵其王
爲安南所害 朝廷遣使封王之弟齊亞麻勿菴未
至而勿菴死其臣提婆苔者攘所封印故復遣公封
王之次第吉來公行上言占城險僻安南之構未靖
而提婆苔又嘗竊據萬一弗順損中國威宜縱其來
使傳命古來仍勅安南悔過 上悉從之乙巳遣擢
都給事中留廣中數年卒致古來厓州而定其封弘
治戊申始歸陳地方五事曰懲舊弊以修軍政設兵
備以鎮邊方開衙門以散嘯聚修城垣以禦寇忠通
朝報以廣德意多見採納尋擢湖廣左叅政常德歲

歎民饑公分守其地戢盜賊抑豪橫通米商禁藩府

之苛葦里書之弊用蘇其民庚戌晉廣西左布政使

屬夷僚爲訐廩食多匱衆口囂然公亟遣官糴諸遠

而給之軍餉以足乙卯遷都察院右副都御史提督

南京糧儲奏修官廨以便分理折支勲官祿米以省

轉輸戊午轉南京戶部侍郎壬戌晉拜工部尚書中

官以宮殿傾圯欲修之屢詣公言公徐曰萬世不拔

之基已有定所修此何爲議乃塞南畿織造多取資

葦課歲久爲勢家所侵公一清之於是課增用足而

民不擾言者又以災傷欲併葦課蠲之公獨以爲葦

洲人所爭佃其利可知苟蠲其課國用不足則將加
派於民是損本實而益浮蠹也抗言尼之雖掇怨不
惜正德丙寅乞致其事疏三上而後允有清慎老成
之褒賜誥給驛月廩歲隸恩數甚優自後權奸用事
士夫保全者鮮公知幾矣哉已巳公薨于家享年七
十有八賜祭葬

資善大夫南京工部尚書韓公重墓志銘

顏 燁

公諱重字淳夫別號拙齋世居絳州祖延齡以公貴
贈通議大夫應天府府尹考英正統戊午鄉薦任泗
州同知多惠政贈如祖官祖妣張氏贈淑人妣文氏
封太淑人公稟資通敏質貌魁梧二十八歲領成化
辛卯鄉薦第六人登戊戌進士授禮科給事中甲辰
捧命查勘兩廣糧儲公帑充實諸可貸者悉予于民
丙午陞本科左給事中弘治改元再陞本科都給事
中在給舍幾九載彈劾不避權勢貴妃萬氏久專

上寵犯顏極諫人爲竦懼時有西僧煽惑滋蔓上
頗溺焉公上章救正庚戌出陞陝西布政司叅政通
歷八郡旬宣不息巡撫王公上最于朝丙辰陞本
司右布政使清軍務督馬政二載陞應天府府尹南
都百司所在賦役繁重加之權貴侵漁玩法難治公
直以愛民爲念苟可興利祛害靡不殫厥心力提調
戊午鄉試得人爲多孝廟制詞曰擢居京兆允協
僉言乃能廉以律身勤而蒞政民懷吏畏弊革利興
悉實錄也冬丁太淑人制辛酉服闋改順天輦轎之
下益策精敷政受知于上復提調鄉試得人之譽

視南都尤著適遼陽有警陞公左副都御史往撫時
奸宦梁瓚在鎮怙勢肆虐公按其不法亟疏劾罷物
論稱快僅一年復勅公撫湖廣黜貪旌廉平徑息民
軍餉久缺公爲請五十餘萬以給軍士乙丑擢南京
兵部侍郎時缺正卿署選軍政兩月不歸私第權要
不得請托正德丁卯轉北部未幾進南京工部尚書
公念東南民困上疏請停不急工役上詔允之是
時逆瑾專恣不快于公罰米示威公懇求休致朝
命方下瑾嗾黨惡計筭財費雖不得實爲其鈎致者
幾年餘懷抱抑鬱疽發于背卒于揚州廣陵公館壽

六十有九計聞 朝廷如例營葬

南京工部尚書陳清傳

南京工部尚書陳清山東益都人天順甲申進士初任戶部主事歷陞南京工部尚書以忤逆瑾矯詔致仕正德十六年十一月卒子欽以間禮部奏清鯁直廉介不阿權貴宜加優卹詔賜祭葬如例

資政夫夫南京工部尚書張公憲墓志銘

費宏

南京工部尚書張公諱憲字廷式別號省菴世居德興縣自爲兒時已莊重不凡遊縣庠以給事中約齋祝先生爲師約齋樂易善謔見公矜嚴好禮亦心憚之諸生會講時公或特入必口祭酒來矣鄉先達兵部尚書孫公尤重公高年里居暇輒招公談論竟日乃罷嘗謂人曰張某台輔器也成化四年公年二十有三領江西鄉薦後三年壬辰登進士第觀政刑部卽留意法比部長貳皆賢之會吏部選科道偶遺公

衆皆疑愕乃授考功主事蓋尚書尹恭簡公讀公所試知其所養欲留自助也在考功歷員外郎郎中凡十四年廉慎公勤如一日甄別流品必先志行遇士夫之賢者輒以人材訪之有所聞籍記惟謹課覈之際以參黜陟其人可用卽踈遠不相識必陰薦之考功以地望例遷卿佐鮮外補者弘治初公資旣深尚書王端毅公探所欲公曰懼官之弗稱耳奚內外之擇乎遂陞山東左叅政行部所至興墜典釋冤繫孜孜政務宗聖公墓在嘉祥蕪穢弗治公歎曰事有似緩而實急者此類是也命有司亟爲修築併葺其

祠遼東僻遠學政不修公督餼之暇時卽贖舍爲諸
生講說其好以經術飾吏治又如此在山東凡五年
陞浙江右布政使鎮守中官縱左右虐民而攫其財
公廉得其人置于理岳武穆祠在西湖故有祭田二
頃爲勢家所據公檢覈畀祠又訪其苗裔使占藉倚
郭得食其租入以世其蒸嘗焉交承例閱庫藏主吏
報羨銀若干欲以動公公曰杭人方苦篋貢以此助
之豈非一分之賜乎吾弗能竊取爲自殖計也仍封
識責之主吏陞順天府府尹事雖旁午公處之裕如
屢請寬卹畿民培植根本旱則竭誠致禱雨輒應期

久之望營權豪使乎士庶考最賜諾有剗除奸蠹扶植善良之文陞工部右侍郎總理易州山廠廠統郡八役民數萬趨走之吏自郡倖而下餘百員故爲姦利囊橐公曰近賦易汙吾其可弗慎哉總理用公差例日廩五升省八郡常供之餽簿書有關防以杜緣絕之欺柴大納銀得痛損加耗之數皆自公始於是宿蠹十去七八而積欠日漸以完矣旣而還蒞部事會今上卽位諸邊告急戶部言足邊賴鹽課而其法久壞請遣重臣釐正之兩浙八閩以屬公遂兼都察院右僉都御史以行親歷諸場炎瘴無所避適三

品九年考滿陞右都御史仍督其事事將就緒而賊
瑾專政議革巡撫召公還公畏瑾勢徘徊於道久之
始至又久之始得蒞院事未幾復改南京都察院歷
一年遷南京禮部尚書瑾終惡公不已附甫月餘內
批致仕瑾誅公最先召用改南京工部蓋正德五年
九月也踐任僅一年以六年二月二日卒于位享年
六十有六 上聞訃嗟悼命禮部賜祭工部營葬事
皆如制

資善大夫南京工部尚書進階光祿大夫李公

善墓志銘

王九思

有用之才

公諱善字宗元家世隴州人也其高祖曰公賜仕爲高郵州知州曾祖惟中贈文林郎浙江道監察御史祖昇由國子生拜浙江道監察御史擢浙江按察副使父溥亦國子生不幸仕爲庾宰後以公貴封文林郎南京廣西道監察御史母馮氏封孺人太孺人生四子公其第二子也公少穎悟讀書善誦不忘公封君愛之遣入州學爲弟子員授易知州陳君者江西人陳君善知人于諸生獨奇公貴甚然氣豪而貌瘠

諸生聞言或目笑之不信未幾果舉成化丁酉鄉試
明年戊戌舉進士授行人司行人出使慶府王以金
幣贖不授行人三年選爲南京廣西道監察御史是
時太監梁芳陳某怙寵市權而南京太監郭鏞亦橫
擅入後湖與同官繆樗等上疏極言雖不報然三人
者寵由是衰矣尋出清理江北諸郡尺籍刮弊剔濫
以影射出者八百人有奇弘治戊申以父喪歸終制
改浙江道出按遼東是時總兵官羅雄偷安弛備太
監韋朗縱其舍人侵漁軍餉奪人妻孥聞公至卽懼
不敢復爲都督王鏜孫貴皆以不職劾罷傳玄者逆

旅舍主人也嘗主貨郎李林林不知所往林子訟玄
殺林有司抵玄死獄成然林實向沽酒婦所飲醉婦
與姦夫謀殺林死利其財公廉得其情玄以不死及
代歸而壽寧侯鶴齡方負勢莫敢誰何族子舍人下
上運河沮擾貿易拷掠無辜謗怨載塗至是有訟者
會在公公曰教授侯門之鈐鈐弗戢故至此矣于是
叅其教授姚倫就問教授懼走匿侯所不出公於是
劾侯出教授就問侯家以罪發戍者若干人京師遠
邇譁然皆知有李御史也然侯實不堪復求撫拾公
天子震怒欲置于理是時在司禮者若陳寬一二

人皆識體苦爲諫止吏部恐終不免遂擬陞河南按察僉事而都指揮李賢者守備嵩盧濫受民詞納賄無厭會公分巡河南道乃劾罷去是時河決張秋都御史劉公大夏與平江伯偕來督修乃求綜理其事者潘臬以公應公爲相度水勢開修賈魯河四十八里改河南注築塞黃陵缺口百十餘丈斷水東流功垂成復決公僅以身免乃更修數月功乃成詔陞俸一級未幾太孺人卒乃歸其後復除湖廣分巡荆襄荆襄間往往多妖孽扇亂者至是有何淮者與其徒五百人僭號稱王攻陷城池劫掠鄉聚巨高者襄陽

衛指揮也善捕賊公以委高而身自微服出入賊窟中覘賊以計擒獲之事平詔陞俸一級其後王景陽者亦荆襄人以左道惑衆其黨熊彥和以子妻之兩人皆稱王謀入襄陽內亂未發而公覘知之亟遣呂高往捕得彥和等及其妖書解京師脅從五百人有姓名籍記公焚其籍不問在湖廣二年擢山東按察副使兵備臨清一日報錦衣衛千戶劉海與一校尉乘船至聲勢甚大公見而疑之執劉海下拷問對曰我京師人曾貴也校尉僕曾喜耳曰劉海詐也聞者咸以爲神在臨清五年擢山西按察使是時晉王竊

宦者門副劉茂相倚爲奸府中金貨輒匿衆無敢言
茂與府中人李成有隙詐逼成幾死成訴之巡按下
公問于是捕劉茂茂急附王王爲之請不從竟捕劉
茂庾死其後劉瑾用事欲爲茂復讐然公自防甚密
竟不能害也正德丙寅擢四川右布政使未幾轉左
四川番夷久肆標掠百姓患苦之巡撫都御史鎮守
太監因民之不忍具奏出師征之公請于鎮守曰當
用兵幾何曰非十萬人不可公曰民力殫矣番未平
而內變作矣非計之得者也曰業已奏請柰何公曰
征未晚也番聞我師至必懼不若因而移檄宣布

朝廷威德讐服其心從而撫降之亦萬全之策也于是檄番果降誓死願爲良民不敢復叛捷聞天子大悅賜公襲衣白金尋拜南京都察院右副都御史會同吏部考察南京庶官甚平乃自引乞休不許慰留之轉南京刑部右侍郎會尚書缺獨理部事獄死囚三人將行刑公以未經覆奏止之明日邸報至三人者移江西巡按御史勘問衆皆歎服庚午晉南京工部尚書公以大司空位高任重不可但已會修孝陵及懿文諸寢殿皆公會計甚悉未久疾作罷歸是時公年未滿七十才不究用識者恨焉比歸而其子

守經先已買田築室及諸遊樂亭池之勝竹樹花卉
魚鳥之趣無不畢具公處之怡然不知老之至也辛
巳夏 天子新卽位覃恩臣下於是司問勞公具
羊酒綵幣尋又奉詔進階光祿大夫鳳翎知府路君
直賀以玉帶羊酒又五年嘉靖乙酉八月疾作終于
正寢距生正統甲子壽八十有二歲云

南京工部尚書贈太子少保柴公昇傳

公諱昇字公照南陽人也少受經於郡守段堅成化二十三年舉進士擢工科給事中弘治三年彗見東井詔求直言昇首疏十五事切中時弊 上嘉納明

年山東河南大水復求時政得失昇言四事 上亦

從之七年詔建昌國公張延齡第延齡 敬皇后同

產第也勢焰薰灼人莫敢言昇上疏論止八年四川

番僧領占竹黃綠行取禮部御史諫不聽昇乃入奏

大略以恤人言杜無益反覆乎孟軻韓愈之義疊疊

幾萬言 上讀之大悟卽命停罷又疏止度僧道徵

董工咸切直語多不錄十三年改兵科適大同虜邊
昇乃劾平江伯銳玩寇殃民師久無功宜罪之以厲
邊士 上卽罷銳偏裨以下各置之法累擢廣東右
布政使平十三村賊賜銀牌紵衣復遷山東左布政
使舟還荆襄先是州縣盛設供帳以俟及昇至行李
蕭然無異寒士觀者興歎正德二年擢右副都御史
巡撫江西已改陝西時革總制三邊率聽制於昇昇
紀律嚴明先聲所至虜不敢犯歷陞吏部左侍郎會
尚書被逮昇攝部事凡病國紊法者一切釐正之無
何陞南京禮部尚書復改兵部叅贊機務以父喪去

位服闋改工部昇辭不允居數月復上疏請老詔始
從之仍給月廩與夫乘傳還鄉歸八年當今上改
元之初言官屢薦特加榮祿大夫遣官存問二年八
月卒贈太子少保昇性至孝嘗分祿養親及親沒前
後廬墓六年哀毀踰禮鄉人稱之論曰柴公其古
之遺直也其論事侃侃無所避忌遭遇敬皇明聖
俱蒙采納見之施行吁亦幸矣

資政大夫南京工部尚書洪公遠墓志銘

楊廷和

公諱遠字克毅姓洪氏徽州歙縣人系出唐河北黟
陟使緯經綸之後宋少師禮部尚書諱中孚十一世
孫大父諱壽父諱寬以鄉舉歷知桂陽鄭二州俱累
贈南京都察院右都御史大母江氏母汪氏俱贈夫
人公少穎異好學讀書必成誦督學御史戴公珮奇
之成化甲午舉鄉試講學于內翰謝公遷之門戊戌
舉進士授莆田知縣前尹多苦勢家請託公于廳事
後置鼓客來坐未定連擊鼓者三羣吏厲行進立侍

卽有請託者屏息不得出一語去蒲地濱海海賊時
發輒損戍兵巡海憲臣議僉民壯代之公力言不可
乃止暮年丁內艱既去而蒲人思之甲辰改濬縣歲
荒極力賑濟全活甚衆議者以濬大欲分隸湯陰濬
人謹曰是使我離慈母去吾不忍也再踰年丁外艱
弘治庚戌改交河縣其惠政如前兩邑尤加意學校
公暇親爲諸生解講文義不倦部使者交章薦之甲
寅徵授南京福建道監察御史數言事不避權貴庚
申陞浙江按察司僉事歷巡五道所至以鈿豪強撫
孤執佑良善爲先務壬戌兩浙饑公分賑嘉湖做富

鄭公青州朱文公浙東舊法叅酌行之二郡獨無流
殍巡視憲臣疏其事有羊酒之賜甲子轉副使巡海
道按察使缺攝司事且一年諸道肅清先後巡按者
列上其治行正德丁卯詔裁方岳剝員調湖廣時有
兩制使在楚一督通負操切嚴急公下令勿亟民不
忍累公爭先輸足一專賑饑擇官分理獨委公以全
楚之半已巳晉廣西按察使廣西郡縣多土官簿書
期會往往牽制或至十數年不結公嚴爲之限於是
辦治如中州無復敢後者庚午遷四川右布政使時
盜賊充斥百務倥偬公攝左轄慎出納裁冗費積羨

高傑相悉以給軍餉辛未晉陝西左布政使尋擢都察院右副都御史巡撫雲南獎廉吏出貪鄙遠徼以安十八寨夷舊常剽奪爲邊患公至皆出降或欲乘機擊之公不可曰殺降不信置無辜于死地不仁掩其無備而襲之不武諸夷聞之益畏服部內有銀礦開則攘奪並起公秘之三載遂定鎮守中貴誅求害人公數抑之屢欲中傷索公無可得乃已甲戌改南京大理寺獄情深求者多所平反乙亥轉南京都察院右都御史論諸言事者務存大體切時弊勿以詆訐爲事御史林有年諫取佛忤旨逮赴詔獄率臺

官上疏救之已卯三載考績在道拜南京工部尚書
徑趨闕下謝且辭優詔答之有清譽素著之褒還任
越三日卽疏乞休致會有江西之變南京調兵備禦
凡器械悉取之工部公時以疾作勉強視事勞瘁日
甚遂至不起距其生景泰庚午得年七十計聞上
悼之命禮部諭祭者再工部治葬域守官以三事稱
出入四十餘年如一日當逆瑾用事時驅馳遠方無
所附麗待僚友和而能諍馭屬吏嚴而恕好汲引善
類有所推轂亦不使人知之性儉素寡嗜慾雖貴如
寒素終身無姬侍疾革子促問以家事不答但曰爾

輩以忠孝立身足矣語畢正木冠而逝蓋公於朝會
時猶對部屬處分公事相去僅七八刻耳其靜定不
亂如此

南京工部尚書進階榮祿大夫贈太子少保諡

簡肅黃公珂墓志銘

楊廷和

公諱珂字鳴玉姓黃氏上世楚崇陽人元季四世祖始徙居遂寧大父諱鑑父諱宗泗以春秋舉鄉試授雲南大姚縣知縣有惠政鄉人稱爲南庄先生俱以公貴贈資政大夫南京工部尚書祖母馮氏母劉氏俱贈夫人公少時嘗從南庄于大姚警敏嗜學姚安守奇之令與諸公共學因謂南庄曰賢郎廟堂器也旣歸爲學官弟子成化十六年舉於鄉二十年第進士授湖廣龍陽知縣其爲政大要以立程式均徭役

禁豪橫興學校息異端除奸弊爲首務劇賊流劫湖
中公密遣兵壯授以方略不旬日盡掩捕之時湖南
大侵獨龍陽熟往就食者相望公設廠四境煮粥以
食之所全活者甚衆部使者列上其治行徵命且下
會有劉夫人之喪閱十月南庄亦卒囊無長物至不
能舉葬事弘治六年服闋不外補特授陝西道監察
御史九年按貴州因其土俗治之甚者乃繩以法金
達長官何瑜父子貞固將作叛公以計擒之削職處
死易流官他桀驁者始懼及按順天等府公曰是多
貴家驕橫不可以貴州之治治也裁斷一主於法無

所假借太監陸愷誣奏人隱占公田下錦衣衛獄有
榜死者公劾之大寧都指揮康淵附勢怙惡詆毀巡
撫憲臣公逮於理遂鑄其職壽寧侯家河間故有賜
田欲并其旁近膏壤得之遺內外官勘量將與之公
言民貧產不可奪事乃寢尋督修 皇城因事革弊
無或敢抗者值隆冬 上特賜華襪一袋且謂侍臣
曰御史勞矣工成復賜晏勞十五年貴州有米魯福
祐之變 朝廷討之命公監其軍酉陽保靖諸土兵
素無節制公召其酋長諭以軍法乃無敢剽掠者軍
中首功百方審驗一夕就寢如閤婦人哭聲滿近索

之不得明日果有殺民婦報功者立送軍門斬之班
師守臣厚有所饋公峻拒之既而行賞雲南視貴州
獨厚公疏言之始並論其功奏復加俸一級尋轉山
東按察司副使巡察海道飭武備嚴守望山賊竊發
輒勦除之封內無警正德三年陞山西按察使斷獄
明允多所平反藩府承奉有罪至死者王爲求庇不
得竟抵以法守藏吏以羨餘獻公斤之退明年擢右
僉都御史巡撫延綏虜犯城下公身親督戰所部踴
躍自效賊敗去亦不剌再之威武寧塞二營堡公發
遊兵千騎禦之斬捕三百五十餘級時謂十數年來

未有此捷嘗以歲例燒荒天忽陰翳風氣慘烈公曰
此虜氛也命輕騎數百伏山背賊果率衆突出我軍
伏起殺之殆盡將佐皆服公善料敵自是虜入寇輒
失利掠韋州歸要擊又敗之盡棄所獲人畜宵遁邊
士月餉故有扣除之弊公痛禁之其羨餘悉貯之官
以備支用士皆足食寘繡作亂傳檄以誅逆瑾爲名
三邊騷動公用間得其僞檄密奏於朝且陳八事
謂寧夏城中有慶王在內人效忠義者多請早出兵
以伐其謀而奪之氣固原官兵宜過河防守請增設
憲臣總制軍務嚴守備飭兵馬定召募賞格選州縣

民兵以助王師赦何錦丁廣部下以開自新之路速賞近日有功官軍以勵人心奏上多見採納隨遣總兵侯勛叅將時源分守黃河扼其要害賊聞之不敢出遂至於敗先是瑾請遣官覈沿邊屯地各鎮畏威奉行唯謹遂有寧夏之亂獨延綏之民賴以安瑾銜之又怒其封上僞檄欲中以奇禍會敗獲免然亦爲所特撫再罰米至五百石矣召爲戶部右侍郎提督倉場七年河南用兵命公總督糧餉時兩河屯兵號十餘萬且進勦奔逸卒難應給公隨地轉輸未嘗告乏每獲賊徒審其脅從者輒釋之有司以官馬獻

諸將或送首級爲從人功皆不受論功再加俸一級
庶一子爲太學生是歲改刑部右侍郎流賊獄成用
事者議欲法外用刑公詣左順門執奏當遵祖訓
中人諭以 上意公猶固爭八年陞左侍郎奉命勘
鄒平子爭襲事公以二子皆庶出幼者法不當襲乃
從禮部原議奪之以歸其長原議今閤學費公在部
時所主也明年改兵部左侍郎宸濠乞護衛公獨不
受賂且執議再四謂奸萌漸不可長文移獨不署行
示決不可與也尋轉南京都察院右都御史會審重
獄有寡婦爲其族人誣與姪姦守備中貴主之利其

財也以嫌無敢辯者公辯而釋之十年考察庶官事
竟自劾乞休不允以萬壽節入賀因乞歸展祭給
驛以行十一年陞南京工部尚書時營造上供器用
多出額外公節財用程力校工雖細微無或乾沒者
三載考績既得地恩遂乞歸至是疏凡四上矣上
念其懇切許之賜勅給驛仍命有司月給廩三石與
隸歲三人公喜曰吾幸完吾名矣何以爲報今上
登極之元年推恩進散官一階十二月一日卒于家
訃聞贈太子少保謚簡肅命禮部諭祭者再工部治
坐城公英毅閎爽遇事有決斷治律精明不事苛刻

所至皆有聲稱居家孝友劉夫人性嚴公事之得其
歡心弟珮早卒撫其遺孤如所生城見背於南庄最
幼攜至京師教之以至成立與人處傾蓋卽如故舊
至遇負氣好勝者則斂退不校待鄉人有禮常曰人
貴知足倏忽百年同歸于盡何必事事求如意也談
論終日聽者忘倦同官有行部于外者每告之曰吾
儕爲此官不可作意去人官爵以立己名得罪于法
者不可容于我有忤者不必計也守官廉介而樂施
好義宗族之貧者婚嫁皆仰給於公致仕後日遊南
津別墅招親舊嘯咏爲樂每遇北來人輒問時政或

不如意終宵不寐曰天下有事吾獨得安枕乎在官
一十有六年受勅獎諭者前後凡四金幣之賜不一
而足其生正統十四年十二月十二日得年七十有
四

資德大夫正治上卿南京工部尚書贈太子少

保叢公蘭墓志銘

費宏

南京工部尚書叢公既捐館舍上聞訃震悼贈太

子少保賜二祭命有司爲營事事公諱蘭字廷秀別號半山世爲登州文登縣人祖諱實榮父諱春俱以公貴累贈資政大夫都察院右都御史祖妣妣俱贈夫人公生而穎異弱不好弄惟耽玩經籍海濱無市本往往手自抄錄夜誦達旦以成化癸卯領鄉薦再試禮部不利自都下嚮書輿歸益加探討自天官三式兵鈴醫術算數之類靡不究心弘治庚戌登進士

第明年除戶科給事中巡光祿寺見有司飾皇壇供
器疏崇尚異教爲先朝遺弊當亟罷尋以外艱歸
八年終喪復職巡房山諸草場蒞內庫出納多所釐
正時災異疊見公言消變當實行今日之務在惜人
才慎舉措恤畿民撫邊戎警怠玩杜貪殘元惡如中
官汪直輩之陰圖復用奸貪如侍郎林鳳輩之未見
罷黜左道如太常卿崔志端之紊亂舊章皆宜懲處
以順上天遏惡之命尋陞兵科右給事中內降以署
都指揮吳安爲都督及邊將姚信以失機獲宥皆極
論之大閱京營與司馬公同心協議務祛宿蠹蓋在

科十餘年遇事必言言必盡中官何文鼎以直言得罪又嘗合臺諫救之至於忤旨下獄而其志未嘗少挫十四年陞通政使司右叅議會以災異求言公又偕同官疏時事列上又明年轉左叅議適北邊有警經略紫荊等關塞蹊隧可通胡騎者數百處復於浮圖峪夾岸創起敵樓增戍兵易將領諸所籌皆百年固守計邊人賴之十八年以內艱歸後三年終喪還朝蓋正德戊辰歲也其秋陞右通政庚午之春逆瑾請遣官規畫邊務兼督糧儲清屯地抽選軍丁而公得延綏至則寧夏之變作矣延綏人竊議洵洵公入

境鎮之以靜衆乃少安時方覈邊功賞不時下文武
官以罰米賠糧繫獄久不克完其請戍除名沒產者
多出鍛鍊考察之令一歲至再三舉行邊民以催徵
逋負逼迫逃竄將家由武舉進者分隸各鎮類愁寂
不能聊生偵事之卒紛紜四出所過莫不危懼公以
爲此數事皆人心所甚不便宜速改而不容緩者疏
至則詔已悉行之瑾銜其拂已欲中以禍公處之自
如數月瑾誅陞通政使旬未浹以三邊告乏陞戶部
右侍郎兼都察院左僉都御史總督寧夏等處糧儲
值歲早禱羣望鞠冤繫三邊皆雨先是關中鹽引利

歸權右及公來無敢私謁商通而事乃濟諸有補於
邊儲者皆一一條上行之是年夏兼管固清等處軍
務聞山東河南羣盜猖獗念內地齊民猝遇兵變必
不勝供億之苦亟疏于朝請別處軍餉以紓民急會
廷議亦念中部地重兵荒亟召公巡撫廬鳳滁和并
以賑濟委之七年春公至鳳陽賊以壓境公督率吏
士防遏綠河諸渡口警報至卽躬擐甲胄身先士卒
奔走邀擊俘斬二千餘人溺而死者數萬賑濟所全
活者又十二萬六千八百餘口撫釋脅從男婦幾六
百人事聞賜勅獎勵資以金帛秋九月師還老稚攀

留爲立生祠還朝論功又陞俸一級廢一子爲太學生加賜金帛羊酒宴于禮部八年又以虜警奉勅巡視西路諸關兼督宣大軍餉九年春陞右都御史總制宣大并山西偏頭寧武鴈門等關軍務再辭不允乃行至邊相地設險令內地居民各築堡入保亦如塞下賊嘗一再深入公自駐陽和以當其衝分部諸將十七人伏兵要害遣謀者往來傳報或犄或角賊乃遁我兵又據險邀之斬獲百有餘級虜酋傷右臂而馳捷聞復賜勅獎勵然坐與監軍不合其軍功竟爲所攘十年閏四月自軍中還命總督清逆兼巡撫

鳳陽諸郡蒐剔宿弊改立條約著漕運錄行於時權
右以私貨祈償皆置不問則相與毀之遂罷督專理
巡撫值歲饑民流公奏截漕粟數萬石益以倉儲賑
之所全活者視昔倍蓰水曹王主事鑿以抗直忤中
貴史宜逮繫詔獄公疏宜不法鑿當亟釋中官劉允
以迎佛使烏思藏所過百計誅求勢張甚公預檄有
司毋徇所欲至淮謁入公辭焉遂疏斥佛老無益乞
還允勿遣高牆庶人有逸而出者公乞并釋其無罪
者以篤親親守蒲丘德以貪虐投人公禁之德爲少
戰十四年逾濠變起公率兵禦之江擒其黨百數

武宗之南狩也至境上見公猶記公前任總制時通
桑乾墮水事屢形顧問驛遞例有宴設多侈費求媚
者公惟金酒卮一事餘皆磁漆進獻物視他郡僅十
一二逆彬數有讒言竟亦無他十五年以六年考滿
進階資德大夫勲正治上卿其冬陞南京工部尚書
聞報卽乞歸展掃已決退休之計矣明年上繼大
統方任耆舊公三疏請老不允公以濠平復陞俸一
級嘉靖元年屢疏上察其誠乃允休致賜勅褒諭
且有月廩歲夫之給踰年而公不起矣蓋嘉靖癸未
二月二十六日也距所生景泰丙子十二月二十五

日年六十有八公器度閎偉才識英敏所學期于經世而言論足以發之自筮仕以來屢將使指經營四方未嘗以艱險避威名在邊塞利澤在生民功業在國家可謂一代之名卿才大夫矣

資善大夫南京工部尚書崔公文奎神道碑

崔銑

公諱文奎字應宿登成化甲辰進士明年乙巳授刑部主事又六年弘治庚戌晉員外郎明年辛亥晉郎中又八年戊午晉河南按察副使閱七年甲子晉山西布政司叅政丁內外艱至正德庚午再除河南是年秋再晉至左布政使壬申晉南院副都御史督糧乙亥晉工部右侍郎嘉靖癸未晉右都御史遂晉南京工部尚書明年甲申引年致仕公蓋七十有四公自部曹至端揆清潔恪厚精完神壯蒞事勤敏中夜

益辦施設舉措必歸於矜慎寬淳以庶於教化靡不
菲食儉陋性成泯德忘勞不較彼已天下同推爲鉅
人長者公三蒞我汴在臬銑自大學歸省在省銑待
罪史官長工部銑叨南雍師公之德政固所見也弘
治初安福劉遜敢摧強家而折橫藩知武岡州減岷
府祿米爲所構惡公以郎中奉旨往勘知州左秩而
祿米亦削白遜誣罪公司刑久事來一鞠而得遇疑
獄卽立辯結要則從寬律嘗出俸贖買槍植庭中因
候訊者免夏日之酷在副使出巡部求民所利病爲
之罷且舉凡獄已得候報可止逮其相敵者餘放還

封丘用爲河壞者三萬畝六十年民猶陪租公奏而
除中牟田惡惟邑南萬畝肥然北阻城三面阻陵旱
歲漚水民取蓮暨魚供稅公相田南有缺口乃弘之
水得入河田乃歲有秋又鑿城爲孔二置鐵窻泄水
城中亦免沮洳云封丘嘗遭亂軍冊多竄名者公究
鈞之實免百人湯陰常璽收官銀奴竊八十兩以逃
璽坐債無從辦在係歷年妻乞食以食公謂知縣曰
吾無能生此囚必也得燕錢乎卽有以掘地得錢者
相毆傷來訴公治罪遂白上官以錢贖璽而釋之温
縣知縣盜庫金有吳拔蹄盜於高黑哥庫子也亦係

累年家人被累死公在布政命縣釋黑哥止以追銀完帖上之省而節取餘銀代輸此二事用意宛轉以情傳律於乎仁哉往年閩省大戶告事竣布政追餘銀又罰以紙蓋上楮也公不以吏告紙乏乃取舊冊覆之爲禁惟上之憲公者乃用咨什省七之費辛朱前寇亂河南守臣議闔省輸軍費公謂非計止發省帑之羨明年上出內帑十萬今賊平公猶以餘銀還京師公既廉約精於計算吏胥無以售奸日夕惟思公之遷去而不怨其嚴在山西太原舊配雲南者數百人有旨改內地而籍未除有司猶解補凡往皆

無生還者公自憲臣移文雲南憲臣同奏去其籍在
督糧改草廠於琶山旣在城中又附倉緩急易相濟
然琶山久據於權人公犯怒取之論者曰尤難在大
司空作器用廠在玄津西旣可嚴防且無襲上供又
奏免造海船具數者公旣退十年卒年八十有四

吳尚書廷舉傳

崔銑

吳廷舉字獻臣嘉魚人洪武中其祖戍梧州遂隸戎籍成化癸卯年十九舉於鄉丁未舉進士授廣東順德知縣潔已如水字民如子減賦息訟乃刻家禮實行之都御史屠淵檄公至督府與之言甚溫欲爲邑構璫修家廟公曰廷舉越境奔命宜有地方重事爾乃今爲權璫修家廟乎守土官非奉舊例新恩一夫不敢役分金不敢用遂辭出屠令他邑成之市舶太監給銀買葛公卽用之買二疋曰奉此爲式如不中意請還金且葛雷產也太監怒取金去御史汪宗器

惡公曰彼專抗上官市已能何也吳公壞淫祠觀寺
以其材作土堤書院賢館及修學宮御史按而會其
直竹木碎屑俱列斤兩鄉大夫二子犯盜並論死公
生其少子標其戶曰盜後少子改行乃泣懇曰公念
先人廉直故存後今盜其門大爲元人辱請就死公
爲撤之御史卽捕盜令自首賂知縣乃毀門表不卽
理前事盜曰盜死分也不敢誣廉令加以嚴刑不易
口是時公囚服搢手日詣訟所分析所由無私盜狀
上御史大慚命釋公弘治丙辰屠入爲吏部尚書遷
公成都同知一年以憂回起松江上疏請修軍政二

勅

事廣東盜起馬端肅劉忠宣薦陞兵備僉事征十三
村池水盜平之改兼鹽法正德己巳也逆瑾用事天
下鎮守恣橫公劾太監潘忠二十罪又奏有旨取省
帑解京皆非正費曰貢進內也曰司禮打點錢賂劉
瑾也又疏便宜事忠亦列上公罪鞫之無狀止以在
道回械首吏部前主事宿進輩謀抹之天官張綵取
閱其諸稿心賞其能言於瑾凡械首十二日放鴈門
充軍再月赦瑾亦誅晉雲南副使江西叅政討姚源
賊用兵已歷年總制臣數易官顧其私兵不協力費
以萬計公雅多知略勇不避難及逢盤錯益喜截決

前已數用兵勝茲則設奇取捷不用甲冑出入輕脫
 論資解散反為賊得奉之入巢周衛耀威劫公求撫
 吳公如前資論詞色亡撓久之伺得賊中要領因用
 其巨力而譴微輕者許以利令其僕妻賊女遂執其
 酋公亦出一鼓平之晉廣東右布政立番舶進貢交
 易之法平驛遞之役弊更患除矣嶺西猺獞作亂命
 兼兵備副使經略湖南饑公以副都御史賑濟辰州
 土官相警公立約使平又疏六事陰備寧濠之變當
 道不用濠反君子曰用吳公曲突之謀無患矣濠嘗
 道使遺天官陸完金簡曰宜急易孫燧代之者某某

疏備
 吳公

俱可吳廷舉切勿令其來濠敗選者獲之今上
爲兵部右侍郎上疏犯輔臣改南京工部又改南戶
部晉右都御史理南畿折豪強植貧弱禁私驛止妄
工公長身而瘠面如削瓜敝衣穿帶不加藻飾神采
英毅志識雄偉言行必自信人鮮能奪之視財利如
糞土妻子冒饑寒而施予不較有無晉南工部尚書
卽疏歸歸二年卒所居湫隘門巷不容鷄飛無郭外
田丘墓之寄十餘畝卒之日無衣以斂無棺以殯都
御史姚鏞爲營辦靖州上官持金來謝德却不受及
是各來弔哭平生篤友誼見良士身下之忘其人已

在大學南城羅景鳴玘四十餘以貲貢公悅其文奇
兄事之景鳴病痢僕疫而死公爲煮粥負之登厠一
晝夜十數反景鳴病瘥同登進士語人曰玘四十前
生我者父母四十後獻臣生我也在順德同年鄒智
疏柄臣奸邪爲所陷謫石城吏目死公資之歸其喪
于蜀倅成都梓其遺文順德生員梁景行直而文公
與之友宗烈棄晉江令返壺山公數薦于朝嘉靖初
起爲鎮江同知大學士楊一清再附薰人入閣其族
子留者于官府害里人宗烈獨治之鞭其奴改王府
長史請于王至蒼梧視葬已宗烈亦卒嘉魚李承箕

世卿不仕善爲古文布衣李孔修子長苦攻詩皆所
厚善忠宣公在廣左轄吳公在令至省忠宣館之省
衙尺書稱大夏頓首公好讀書無不窺索積至萬卷
好文清及胡敬齋錄采其要言作詩效陳白沙覽者
見其致簡牘情理精切規人所不及無諛詞奏草煩
悉剴當俱未編次爲集卒時年六十有六論曰銑平
生頗識當世賢上大夫如吳公真才潔履厚行定力
鮮健也銑嘗謂之曰許友死未知公然否此外公優
爲之嗟乎吳公衣食人惠廣矣妻子不能延朝夕服
政四十年百瘁九死皆歷之不能一月安于朝推下

賢哲不憚屈已比卒未聞報德者孟子曰命也

又別傳

吳廷舉字獻臣蒼梧人丁未進士賦性知勇自奉菲薄士夫稱爲渾身是膽皮囊是智弘治二年知順德縣下車首興學校毀淫祠飭縣治優老恤孤重梓家禮儀節示部民更新應祀廟社隆歲事凡可以激風俗者悉舉行之足稱能吏焉時有中官至邑要求厚賄率士類逐之出境人皆稱快陞成都府同知歷廣東按察司兵備僉事在清遠創兵備道立演武亭軍政肅然盜息民安遷副使右布政使仍兼兵備副使

嘗爲佛朗機國通貢頗貽民害論者少之終南京工部尚書廷舉禁淫祠條約本職近因賑濟親到所屬龍江龍山二堡地方循行郊野見有五嶽神廟塑立神像戴冕凝旒執圭稱帝剖生醜酒費出土民主祭司香權歸巫祝諛又甚褻瀆尤多殊不知五嶽惟五方諸侯得以祭之其法則除地爲壇削木爲主祭以二仲號以本山有事則天子遣官以炷香無事則守臣封扁而致祭其禮至重其分至嚴今每鄉數廟每廟五神是庶人而僭諸侯之禮是以三公而擬天子之稱廟宇幽沉旣失立壇之義儀容儼雅又

乖作主之規臧氏之蔡不足以盡其過季氏之旅不
足以比其罪及照本堡及大良等堡野鬼淫祠克閻
列巷歲時祭賽男女混淆甚至強盜打劫亦資神以
壯膽刁徒興訟必許愿以見官似此乖違俱當究問
本欲施行于既往庶幾懲戒於方來念小民之無知
由長官之無道若非敎而後毀終至毀而後興非徒
壞我民心抑且傷我民力合應禁毀以正幽明今備
榜曉諭通縣百姓各宜孝順父母恭敬長上和睦鄉
里教訓子孫士農工商各專一業錢糧稅課不失其
期四時八節各祭宗祖春祈秋報共祭土穀母教陵

詞訟母搶割田禾母害衆成家母欺公玩法母學賭
博賭博必傾家母學爭訟爭訟必破產母學散仔散
仔必喪心母學盜賊盜賊必喪命凡其遷善去惡之
路是皆消災獲福之門不須詣分外之神祇空至費
囊中之金帛各逆邪心母貽後悔通縣計去淫祠二
百二十五所遺下地段改作社學鄉社學訓誨子弟
示教鄉民

南京工部尚書簡菴陳公雍墓志銘

孫鑛

餘姚眉山之陳相傳爲江左陳帝裔隋平江左陳諸宗分散或流寓上虞已徙餘姚夏少畝有陳悅者仕爲常侍歷四百餘年世系莫考至宋宣和建炎間陳升以禦寇功授武功大夫其孫臯乃遷眉山云尚書公諱雍字希冉號簡菴父諱願封工部主事贈工部右侍郎兼都察院左僉都御史祖父諱信贈官與父同曾祖父諱安善又上三世元督運副使曾久又二世卽臯也公登成化甲辰進士弘治改元授工部主

事轄修通州倉及磚廠廠去河遠納磚者不便乃移
置水次又舊磚止隨到報數駟會或私買營利莫之
察也以是歲額常缺公乃立例兩月一覈實又移取
儀真臨清兩廠報冊與收簿對缺者按原發數根究
主名責之償仍募令首納不一年宿逋悉完自是廠
中政清無負一磚者績滿以明法比改刑部主事與
修問刑條例遷署員外郎斷馬回子大獄名益起尚
書白公昂甚重之滿六年實授又二年遷湖廣僉事
初公祖父贈公嘗以浙掾滿改保定蠡掾後赴京卒
妾吳及幹僕敬力弗能還遂扶柩歸蠡殯叢祠側敬

死子隴移葬留新莊歷五十年無音問公進士歸省
時往來兩過蠡訪之不能得隴亦不知何往會公同
年友何琛知蠡公託之而敬有甥李檀爲縣隸吳亦
有甥王強因檀問強遂得墓所又出敬所藏贈公曩
自姚赴京時所齎傳及故友徐祖律與敬二札以爲
驗何因命兩人至京報公公見之悲不自勝旣刑部
六年復歸省乃過蠡展墓歸復于考封公至是則啓
蠡墓歸與祖妣鄒淑人合葬于桐樹湖云僉事分巡
湖北於辰州捕巨猾某靖有貪叅將胡瀚則以達兩
院黜之滿三年改巡荆南監利大盜黎彥斌父子五

人出沒蘆坡中衆至百餘公擒其四子彥斌遂自出就獄 壽王之國保寧道由荆南宜都知縣王某斂千金餽 王公捕治知縣以金還民 王先驅有倚借以賄者亦法正之中官欲暫駐夷陵畏公卽急去丁父封公艱復補江西僉事分巡九江先是浮梁諸生六人赴省試宿于景德鎮被殺又淮藩奉祠某奏承奉舒芳門正胡王隱惡數事兩獄經數年不決景德在浮梁西界富實過於縣多豪民嘗請創爲縣治浮梁人不欲遂中止尋有六生被殺之事是時坐謀殺繫者十餘人公呼至案前一一口問之手記其辭

卽仍令錮之獄而蔭令人之景德潛使之見市中有
談其事者故佯爲不知愕問故因至其所宿舍視其
門戶牆壁詢盜所入已乃增捕十數人窺市談者其
中作三次捕至屏人以向語質之皆謂先至者已吐
實不能隱遂正獄豪民李光祿爲首從者數人皆鎮
中惡少也淮兩豎有投鼠之忌不可窮詰然其人足
以死乃當以可死罪而他涉及曖昧者悉不問直指
據以聞俱報允丁母胡淑人艱正德初復除山西僉
事遷右叅議已遷副使是時巨闥瑾竊政柄厚望諸
司以貨公絕不與通而瑾故銜少傅謝公遷以公與

同已益瘼索欲中之卒無纖事可摘乃以稽遲簿書
罪罰米者三瑾有異父女弟談適布政孫逢吉生子
聰任兵部司務狡獪多智瑾倚爲謀主凡僞作詔
令多出其手自謂力能生死人氣張甚大臣莫不柔
色下之四方餽遺珍物相望於道聰渾源州人公初
補山西時以省帥故盛供具邀飲公託疾不赴履任
後亦不以札謝聰大憾之捏爲蜚語聞瑾將中以奇
禍會瑾敗得已聰亦坐誅詔下山西籍其家公奉
法以治弗株連州人感焉遷廣東按察使少傅梁公
儲家在南海子次愷驕橫多勢取人業啜汁者復倍

為攘奪遂起爭至殺人兩京言官交章發其事并及梁公或稍為調獲輒中白簡 詔遣給事中劉混刑部郎中張文麟覈之皆顧望莫敢斷公檢故牘嘗當次摭謀殺人從者不行減行者一等杖徒又殺人時次摭已赴京里狀月日明白因嘆曰可避言而故重坐乎即如前擬兩勘官默然服奏上得允聞者莫不心譏焉廣州有鴨埠稅供制府犒士雜用畜鴨者動以數萬計縱之蹂踐禾稿莫敢問問者輒被罪公革其稅并取鴨埠志焚之民賴以安上計京師遷河南右布政轉貴州左公為人敦實雖內修居官以盡職

爲務卽瑣細末節衆所不屑經心者皆必嚴必慎不
厭事然亦不喜事事至則殫力圖之旣畢不以矜於
人有問者謙弗自當也以是衆不忘然民庶則銜德
懷惠結於心不能忘矣自貴州擢都察院右副都御
史撫治鄖陽值歲饑爲請太和祠稅周給之漢中知
府賈銓恃輿援肆爲貪虐陝西撫按劾之不能動公
列其貪跡數十事上銓聞遂解印綬去衛卒爲暴於
均州有司捕之聚衆逆拒公移文詰責卽共縛賊魁
鄧璽等首服是冬乞休不允又二年 乾清坤寧官
災 詔湖廣四川貴州三省採大木擢公工部右侍

耶兼左僉都御史領其事復上疏乞休并陳採木利害大約謂木產於人跡所不至故能成其大土商採木省積之谿谷間俟大水浮出然類皆中材其巨材以民無所用之亦未有採者恐非水力所能致故買木不費金致木費金不苦顧儻苦侵漁今願以兩法行之中材仍故事募商自致但微增其直巨材官爲採之以庸法徵金募願往者謹給直寧富役夫毋飽宿猾詔勉留公卽下工部博議皆如公策公徧歷三省鑿山通道沐霧露披薦莽至險仄處或舍車援藤葛行度高下遠近以程工力見役者必溫語慰勞之

衆大悅咸勸於事三年木數萬至京師上嘉之賜戲
麟服初公議直稍寬衆謂額太踰慮或不給於費及
竟役願更餘數萬金世宗卽位召公還部有司以
餘金請公覈其數令各貯所在庫曰以待後役及叙
功又縣推讓於前侍郎劉公丙因與劉公各蔭一子
入太學公前三品績滿已蔭孫孟熙茲又蔭孫孟愷
云又二年兩官成賜白金彩幣乞休不允出攝易
州厰尋擢南工部尚書公攝厰時有所釐正不便者
或騰謗言官不察輒以詆公上潛邸故在楚習知
公楚中治行不直言者然公前已屢乞休至是遂堅

求去 上惜其去不許又固請乃許致仕令乘傳歸
仍命有司月給米二石歲與夫二人後四年復詔進
一階公家自祖贈公父封公皆善爲詩公少習詩十
歲卽能作絕句後居官凡遇事皆賦詩紀之歌行尤
工巡湖北時作觀風行豪宕激烈有唐人遺調楚中
傳之及茲歸惟日與故人賦詩爲樂好訓迪後進來
見者輒勉以行義不獨學也遇仕人則談政事不置
於四方事勤勤問聞有善政則喜八十餘精力不衰
對客終日危坐無欬側客見公高年或謂退公曰吾
未疲也長夏不晝寢晡後必觀書不則理一事至乙

夜乃寢比及鷄鳴起矣嘉靖庚子年九十詔下存問
直指王公紳將 命至宅見公儀度閒談論怡然心
服年九十二壬寅冬十二月二日卒詔與祭二壇遣
工部主事謝體升治葬後十四年祀學宮

南京工部尚書張公嶺行狀

費宏

公姓張諱嶺字時俊別號楓丘東浙蕭山人也成化
癸卯領鄉薦丁未登進士明年弘治改元簡纂憲
廟實錄於蘇松常鎮秉筆惟公不惕權勢二年己酉
除江西上饒縣知縣公性介直實心爲民不徵聲譽
清節過人量田土清稅糧民甚德之置浮橋以利涉
民賴永濟巡按御史交章表薦吏部考治行第一丁
巳陞南京兵部車駕司主事先是部屬入守備屢見
中貴執禮甚卑公肅揖而已遂永爲式自是剛正之
名赫然矣庚申陞本司員外郎相繼丁內外艱甲子

服闋改授南京刑部河南司員外郎不攜家室獨處
旅館乙丑冬陞貴州司郎中正德初劉瑾擅權勢傾
中外適隆平侯張祐卒無嗣弟姪爭襲奏行該司勘
問賂瑾囑公公不可奪乃矯制取入刑曹戊辰陞興
化知府單車抵任惓惓以爲民爲念禁奸戢暴吏不
敢肆閩郡以寧父老咸噴噴稱曰眞良二千石也瑾
又以異香下諸郡責賄公不報郡人戴大賓者弱冠
及第瑾欲以姪女奪其舊聘囑公主之公復不應瑾
怒甚遂撫隆平侯事落職當 儿旦祝 聖畢卽徵服
東歸杜門謝客瑾伏誅起 今南雄清操益勵甫一年

陞江西叅政去之日行李蕭然老稚泣送不忍捨立
祠於庾嶺祀之時宸濠潛蓄異謀賂結中外諸臣亦
欲要致公陰使黨人王泰郭宇道意公正色拒之適
落災乘釁劾公賄權豎張雄輩謀罷公賴當道持之
竟爲奏釋時當述職廷論公賢能宜加旌異獲拜絳
段羊酒之賜亦曠典也遷本司右布政使尋轉左時
濠欲拓府居以擬大內公拒之濠爲掣肘因斥曰病
風子乃戒其下慎勿干投遣承奉劉吉饋以四果啓
視之則棗梨薑瓜也公曰我知之矣是欲我早離江
西耳臣子受命於君行止非人所能一時縉紳咸以

鐵漢稱之濠忌終於妨已賂擢爲南京光祿寺卿尋
拜右副都御史巡撫保定地多閭宦有所犯者公秉
法不少假借遇 武廟巡遊權豎江彬錢寧輩往來
旁午誅索郡邑公一無所應統轄安堵羣小謀以擠
公公遂移疾乞歸得回原籍濠旣敗都御史劉玉許
廷光交薦不起辛巳夏恭遇 今上入繼大統詔求
耆舊御史周宣等力薦之起擢右都御史總督兩廣
軍務兼理巡撫乃計擒上思州官黃鏐剿平劇賊嚴
阮蔡猛三等諸寨斬獲萬餘人捷聞降勅獎勵慰勞
有加若江福流賊江小范四梁八尺黃萬山賴廉李

文積等劫陷郡縣勢頗猖獗公悉討平之民藉其惠
公秉軍政賞罰明信撻奸發伏如神尤痛懲貪墨吏
以是謗言漸興屢疏乞休不允甲申秋滿三載磨子
弁入監是年冬取掌南京都察院懇疏力辭不允乙
酉蒞南臺振肅風紀羣僚凜然如內臣黃玉守備舍
人曹顯等皆以法治之無所顧忌尋陞南京工部尚
書適廣西土官岑猛伏誅兵部謂公先事疏惡功不
可泯奏 上恩賜銀幣丁亥四月得致仕戊子七月
詔進一品階榮祿大夫辛卯正月十八日卒年七十
有四巡視都御史胡璉稱其存心制行大節無渝體

國憂民瀕老益切巡按御史李佶則曰爲人耿介制
行端方始遭賊瑾之殘已經擯斥繼當逆濠之暴累
敢抗衡幸際盛時獲終正寢禮部得請如例祭葬公
平生剛方質直服用朴素居鄉出入不用輿馬處鄉
人如家人父子情意藹然接有司未嘗不以時政得
失相規如力言恢復湘潮及勸築西江北海塘毛山
閘以免山會蕭山三縣水患民籍其利居官四十餘
載今計其所殖止足自給其操守之廉真所謂始終
不渝者矣

南京工部尚書胡公瓚神道碑

卷之五

公諱瓚姓胡氏字伯珩別號紫山廣平府之永年縣人也曾大父忠大父貴世居鄉力農父文舉明習三禮爲太學生公少警悟年十六補邑學弟子員善爲經傳義督學御史陸澗愛奇之登弘治癸丑進士明年授官行人屢奉命湖廣河南山西冊封諸王至皆以謹廉稱庚申擢監察御史乙丑按關中尋丁外艱服闋復除監察御史再命按關中故事御史按事例一年歸逆瑾專政累年符牒下諸省事未竣者皆令公督上之遂留陝二年始得代瑾誅陞南京大理寺

承尋陞大理寺右少卿轉左時 武宗皇帝命太監
蕭敬錄囚大理寺公時握篆遇有疑獄輒爲敬反覆
辯之敬歸白 上謂公爲真法司遂有寶鑑內阻之
賜大司馬胡公世寧初在江西疏逆濠異志逮繫獄
侍寧脅刑官必坐以誣告親王罪至死公曰濠謀賴
世寧以發而置之極刑何以服天下遂與輕比議上
留中衆謂不測公不爲動後世寧竟得戍遼東公等
但奪之俸丙子陞都察院左僉都御史巡撫大同興
利革弊剔蠹除奸宗室有遺毒地方公疏其罪錮之
高牆復上邊務六事其略原情罪以責職守嚴事例

以防推避體人情以省支費奏間牒以資探報明賞格以激人心增兵備以專經略上皆嘉納之庚辰武宗皇帝幸大同虜大舉入寇公督官軍與戰大破之上賜聖書褒美及蟒衣三襲復推恩任一子爲錦衣衛百戶公乃以沙漠之地上不宜久留而扈從邊兵及諸從臣多怙寵大爲邊地害上疏極論請回鑿至引漢袁盎諫文帝馳峻坂之論不報公因乞休乃與告歸辛巳卽家起操江留都疏陳江洋事宜大略專委任明約束實軍伍示激賞處戰艦時操練上皆從之尋陞右副都御史會上兩宮徽號

推恩祖父母父母皆贈如公官癸未陞南京刑部右
侍郎尋轉北刑部甲申陞戶部左侍郎乙酉大同卒
亂戕害撫臣劫掠庫藏 朝廷命大臣撫之益驕悖
天子乃赫然震怒勅公提督軍務偕總兵都督魯
綱統兵往公曰此首惡數人耳豈宜濫及無辜吾惟
殲厥渠魁當自定耳未至大同四十里駐兵授方略
於羣將都督桂勇朱振由是首惡就誅地方悉平還
京 上嘉公功有白金綵幣羊酒之賜時有短公於
上者公不與辯第屢疏乞休 溫詔勉留之初懇
國有賜田山海撫寧諸縣幾千頃業已給民而其孫

光祚復請之公謂撫寧逼近邊塞貧民世守之業奉命所關奪之恐生意外變由是上卒不與戊子陞南京工部尚書奏裁內監局冗食工役之半履任九閱月致政歸逾月以疾卒於正寢實惟嘉靖己丑六月二十四日也壽五十有九天性亮直事親孝處兄弟不私其財俸入輒付其兄令營生產二弟令進學京師不靳其費以故累大官囊無厚積嘗居言路舉刺務存大體不事苛細以取時譽游歷臺省要惟自信自守不爲探刺趨避蓋長者云好爲詩有唐人風致所著有柴山詩稿若干卷

南京工部尚書贈太子少保何公詔墓志銘

張壁

初南京工部尚書石湖何公懇疏乞休 上賜溫詔

許乘傳歸其鄉歸訃聞 上嗟悼贈公太子少保遣

官諭祭管葬公諱詔字廷綸石湖其別號少沉靜恂

慤稍長有軼才從其鄉初進士廷元遊篤學罔倦爲

諸生累試有聲同儕推讓弘治己酉占浙江鄉試丙

辰登進士丁巳授南京工部主事能聲輒著戊午適

壽王之國受命護從所過嚴戢下人俾就約束初有

司辦江舟數千艘候送過峽公以禮法諷貴璫乃取

陸道行先期至峽口卽減汰舟三之一官民稱便已未監造海舸工匠久逋負公召與約曰若當速繁若當謫遣今姑爾貰試再與爾期爾其速完衆咸曰惟命卒亡敢不完者壬戌遣直菴公喪乙丑服闋改工部管繕司主事時 孝皇帝上賓公督造山陵磚石綜埋甚精兼省勞費正德丁卯轉屯田員外郎未幾進郎中逆瑾方擅政怒不已附竟以他事下獄罰米二百石庚午陞永平知府值旱蝗公禱神祠且出獄囚枉繫者翌日雨霑足蝗不入境民感歎有嚴明太守之歌中官石姓者素善瑾乃怙勢誣其鄰爲盜者

十四人以洩宿怨縣官鍛鍊成獄公廉而出之守邊
太監王宏素踞視郡縣公竟不往見宏銜之陰使人
瞰公動靜中傷之竟亡所得而止劇盜劉六等猖獗
則治城繕兵賊猝至但遠城數回輒引去撫巡薦公
善保障銓部方擬推用丁董夫人憂歸乙亥服除改
永州府適彬桂用兵邊備告急公力請當路曰楚多
窖積若得銀可省餽運卒如公議又率兵直搗賊巢
撫還協從全活甚衆今副都御史毛伯溫按河南時
質首薦公太約謂公清慎勤勞可當大任 上命陞
俸一級庚辰遷廣西叅政上思州苗弗靖公剿平之

乃以捷聞

上賜金緡嘉靖癸未轉福建右布政使

乙酉陞右副都御史巡撫保定諸府兼提督紫荆關
有指揮通權肆虐人莫敢撻公劾寘于法達官破賊
有功者仍給資糧公曰賊且退柰何復費資糧亟奏
罷之丙戌會天災再上疏引咎避位得旨慰留尋召
爲工部右侍郎適悼靈皇后薨公會計山陵工費及
董造敬一箴亭亭成勅燕翰林且有金幣之賜會通
河久塞 上命公修復公集丁壯若干分工疏導修
治如初至今省車輓之費爲多己丑陞南京刑部尚
書尋改工部會太廟前殿歲久圯壞公奮然曰寔惟

我祖宗衣冠神遊之所工豈敢緩乃銳意經營逾
年凡皇城官府爲之一新上賜璽書褒美今大司
成涇野呂公碑述甚詳先是工部帑金不滿三千閱
五年乃至二十餘萬人謂公均委積汰冒濫所致云
公卒之日爲嘉靖十四年正月二十有六日距生天
順庚辰三月十有四日得壽七十有六平生直諒未
嘗以氣加人而中耿介不可奪守官務大體不求赫
赫聲然志在奉公嘗語僚屬曰事求稱食天未有弗
報者性至孝居父母哀毀骨立處兄弟篤友愛尤嚴
子教副使君從宦每遺書以親賢遠利爲戒不受請

託亦未嘗請托于人居官四十年家無餘貲室無侍
媵君子曰古之大雅何以加諸何之先有諱執中者
仕宋爲名相後徙暨陽金牛嶺下再徙山陰祖諱宗
政父諱昶以公貴俱累贈南京工部尚書

大司空楊公麒墓志銘

歐陽必進

嘉靖戊申秋九月二十四日南京工部尚書四泉楊公卒於位事聞詔賜祭葬如制公諱麒字仁甫號四泉姓楊氏世廣信上饒人由曾祖以上多弗耀祖諱某父藍山丞諱某皆以公貴贈嘉議大夫工部左侍郎祖母某氏母徐氏前母王氏娶徐氏繼娶毛氏贈封皆淑人初藍山公禱嗣於衡岳感異夢若有送麒麟者已而公兄弟生遂以命名公生而穎異始能言授之書應聲成誦八九歲能暗誦五經稍長競競自愛步趨率有繩尺靜夜閱書盈帙每誦諸葛公澹泊

寧靜語暢然自勵而性亦近之正德丁卯舉於鄉

今上登極始舉進士授知長樂縣丁徐淑人憂復除
澹縣前後皆以廉惠稱而覈田牧馬貴強不得敗制
澹民尤賴之流移還復而甦麥有秋民歸諸德政之
應焉召拜吏部主事陞員外郎尋補外爲福建按察
僉事飭建寧兵備時宰有欲庇其親故者公無所假
借人服其不撓晉南京通政叅議應天府丞南京光
祿寺卿調光祿寺晉武工部 太廟營建 上嘗召
公卿面對日公爲工部長侍郎事竣賜白金綵幣俸
級章服視尚書居久之有扶鸞降神請修良鄉河橋

者并署督修官姓名以聞 上皆許之既頒勅復追
改特以命公蓋於是意有所注矣公之才始試於縣
令繼試於憲僉他所歷官皆事任不專未有以自見
至是日接中貴及土商雜役應酬冗瑣而能以溫恭
長厚不苛不激爲衆所與故計料多損削督辦尤嚴
而人無敢怨怒費省而功倍 上嘉悅賞賚有加明
年真拜於南人以爲且將大用而公遽不可作咸惜
其未究厥施云

南京工部尚書彭公黈傳

彭黈字道顯安福人嘉靖癸未進士授祠祭主事乞
南得儀制比滿考至京見山桂公爲大宰素廉公將
留之銓署友人諷使私謁不聽乃改光祿丞自丞陞
少卿繼遷南太常起艱復補太常未幾陞南光祿卿
復改而北兢兢職事不敢懈故事官禁取辦出中使
傳命不可考驗公調劑裁省而中使顧益畏愛莫敢
相狎自光祿陞僉都御史撫山東適妖賊猝熾乃先
以撫緝而剪其凶渠患以不延遷副都御史撫河南
河數徙其故道爲灘田沒於王府盡括之官歲得數

十萬頃之入以代虛稅貧民用甦而王府亦戢不得
肆然爲疏處歲祿卽又未嘗不寬厚周詳擢刑部右
侍郎會王聯獄起株連士大夫至數十人公委曲奏
貸多從末減轉兵部左侍郎巡撫應天位益尊而舉
素無改於故一不以餽遺交際病有司有司所病逋
負探其穴窟追償殆盡奸民厚估進供歲幣之直而
抵以惡濫所有覈回又均之列郡乃獨坐奸民而歲
之所省以萬計之至於十數未幾倭寇迫太倉兼程
趨蘇蘇城門晝閉卽下令盡開諸門以納奔潰復制
機宜爲驅勦計先後擒斬至千餘級陞南工部尚書

月餘寇復至言者以先事咎公激 上怒逮 詔獄

未幾罷爲民以歸朴儉猶然布素復東子姓籍僮僕
不以潤鄉閭關有司里閭不知有尚書也此卒人莫
不哀慕之公爲人沉篤純懿言不出口恂恂如儒生
而以禮自防皎然如處女其中坦蕩不留他腸人人
可與託交至遇叢冗臨患害迄不可動爲太常時疏
修省獨指斥貴戚借越請加檢制大僕楊公以直言
廷杖公逆知禍在叵測冀有以生之密爲具食而使
卒偵邏者接於肘腋咸竊指目迄不爲動楊雖不救
聞者壯之羅大史稱其審於進退之宜明於禍福之

故介於取與之節人所競趨退然若愚人所嫌畏秦
然獨往蓋寶錄也

贈太子少保諡恭簡南京工部尚書印岩王公

鈔墓志銘

公諱鈔字子宣別號印岩以舍傍山名也相傳晉大保王祥弟覽之後世家會稽高祖文琳以貴雄閭里而性好施當宣德間歲儉輒盡出庾中穀以賑餓者璽書旌爲宣義郎曾祖皎祖徵仕郎玉樓君濂守其家風里者貧者待以炊喪則藉之殯及公貴人謂天之陰隲之也父復齋訓贈兵部右侍郎都察院右僉都御史母錢贈淑人乃府君出後叔父仁卿府君溥故公祖玉樓不得贈而贈仁卿如復齋云初公伯心

齋諾舉弘治癸丑進士尹弋陽以賢能徵道卒公生
七歲就塾家人或謂之曰而復能如伯父舉進士乎
卽竦然應曰而謂讀書舉進士已耶聞者異之其在
塾也端重不與羣兒狎年十四入邑庠劬書疾學每
試輒先曹耦嘉靖壬午發解浙闈癸未第進士甲申
授南京水部主事丁復齋君憂已丑服闋補北水部
推稅荊州而其地則豪商大賈所湊集也魁駟猾僧
因緣爲奸至者率不免於緇公獨攜一力嚙孽茹荼
一介靡所染有羨利則稍弛其征以便商及代而去
肅然敝篋也甲午轉江西司員外郎福建司郎中審

五聽滅五疵孳孳求民之衷會有勢璫所脫人獄甚
力公峻却之乃絕不與中貴人通凡經論決成稱平
焉乙未出知邵武府每晨起視事洞開重門竟日坐
堂上庭宇寂然無一人敢左右睨者百姓望之以爲
神明也有事則各輸其情蓋笞朴幾措矣有訴娶婦
而失其實粧匣者公詳其詞曰此非外盜必與若同
居而異心者耳首則可以贖罪不深治也明晨一人
持所盜物陳於庭僭頌乞罪果其同母異父弟也其
不怒而威多若此時有揚行人者以使事道於郡橫
有需索吏民苦之公取其西山心政經遺之楊慚而

丞去巡按白御史行部望公以非禮而公願以禮自
將不爲折詘乃御史深心銜之下車立索庫藏刑名
諸案牘欲有所撻發而終不得其隙余時以分守與
御史偕從容言曰此廉吏也不習爲恭固其性然庸
有他乎御史意悟謂其治狀特懋稱曰若是其兢兢
也而不爲才良哉已乃上書薦之曰清苦成性剖斷
如流平易近民而遠近懷謹嚴率屬而奸弊革雖古
良吏何以過之斯出於恚者之口非夸言也已亥考
滿當陞矣有嘆公者曰清操士宜主財賦竟轉爲福
建都轉運使而公之爲轉運也如分司荊州時鈞稽


宿蠹條畫甚精于時福州缺守巡按檄公署焉郡在省郭垢弊莫殫公夙著簡肅不嚴而治民有異母兄弟爭產訟者久之不息公諭之曰若等非皆若父所生耶若父之心寧忍使有一不足哉爭而勝之則一不足若父憐乎若子也而以貲傷父心寧復爲若輩血食耶訟者感泣讓其所爭而退肖公像而祀之癸卯丁錢淑人憂服闋補長蘆丁未擢雲南布政司左叅政分守諸民故習夷男女多野合公嚴爲禁諭稍稍有變者庚戌轉按察使辛亥轉右布政使癸丑轉廣東左布政使在二省兩提秋試綜理嚴密稱得人

丙辰入覲陞都察院右副都御史提督南贛汀漳軍務所轄故多洞賊竊出剽掠而當事者益從而騷之乃愈益不靖調兵轉餉無寧朝夕公至則一解諸煩令惟責郡縣恤筭獨撫流移不煩兵而底定丁巳轉兵部右侍郎兼都察院右僉都御史總督兩廣軍務兼理巡撫事四履之地凡皆盜窟也若肇慶府扶黎蔡海大羅山諸處尤為雄鷲時時破壞城邑公乃發偏師授方略禽其魁馬天恩李汝端并從賊七千八百人破巢二百有奇奪還被虜男婦五十八人特詔優獎廢一子戊午倭寇自閩轉入拒陽其勢張甚公

調兵邀擊斬首三百件百有奇奪還男婦四十人
上聞有白金文綺之賜已而復犯潮陽調兵擒剿百
七十人奪還男婦亦百七十人 上聞如初賜是年
冬長樂興寧龍川程鄉諸處及羅絲洞賊復相煽動
公會兵擒斬賊首尤德虎楊球鄧子修黃老虎及賊
徒三百六十人奪還男婦五十人 上聞亦如初賜
公念廣中寇盜頻繁當有以遏其衝乃相度要害添
設廣寧縣治斬賊出入而不逞之徒稍衰止矣先是
督府自置賞功所諸凡金錢得恣出入無與數者公
改貯梧州府每有犒賞移文給之出納有稽嫌議不

作而軍儲亦漸贏矣雄梧二府稅錢舊以資軍餉者
遂皆罷輸北邊云已未考績進階通議大夫贈封祖
考妣如制復錄廢一子未幾召爲南京都察院右都
御史掌院事公浩然有歸志具疏乞休時同志鄭端
簡公曉惜之公之去索其疏而寢之已而蒞臺則風
紀肅然權貴斂手正身率物諸御史莫不嚴之庚申
入賀萬壽節改南京工部尚書尤極意節縮內臣有
以殿門泥金濫科者公條其費省金直以萬計他裁
約類此是時公望茂著不日將內召而公乃明年乞
骸骨辛酉正月得歸杜門謝客絕跡城市嬉遨林壑

間見者不知爲鉅卿貴人也丙寅二月五日卒前一
夕大星隕其舍光焰燭天卒之夕印若崩者何人謂
公所感召有足異云訃聞詔贈太子少保賜祭葬謚
恭簡



南京工部尚書進階資德大夫正治上卿礪峰

康公太和墓志銘

林庭機

嗚呼此予同年礪峰康公墓也公諱太和字原中祖居崇福里礪前山公始徙居蒲城其先諱夢庚者仕宋爲監察御史宗正少卿數十傳而生良義爲公祖良義生長源公父也俱以公貴贈南京禮部右侍郎祖母張母崔俱贈淑人公少穎嶄然頭角弱冠補邑庠生有聲學校嘗遇貞肅見素公于道公降輿與揖明晨踵謝公延坐獎進久之甲午領鄉薦明年登進士世宗皇帝御文華殿親試選庶吉士丁酉授編

修公念母老疏請歸養得旨聞淑人訃哀毀踰禮庚子復除辛丑同考會試乙巳預修會典己酉主試順天時與閩官贊同事閩病錄文多出公手辛亥遷右春坊右諭德癸丑主順天武舉是年遷翰林特講學士視院篆先是竹巖柯公植栢于庭公至慨然有景行之志當是時分宜用事無論館閣莫不奔走其門由是黃緣倖進者多公絕跡不事干謁予亦閉門株守與公同志分宜每陽與而陰抑之甲寅公筮仕幾二十年始進南京禮侍時倭夷孔棘詔九卿各陳所見公疏屯要害練鄉兵固防守寬委任四事 上嘉

納丁巳考績得馳封如例公守南部八年不調或諷
之曰曷少貶以徇時好公曰升沉有分吾安能僕僕
權門以僥進哉乃作拙宦對以述巳志辛酉遷南工
部尚書公正巳率屬罷一切浮靡之費會景殿下分
藩之國道金陵凡百經費皆預爲之備居頃之殿下
報至順流而下咸謂公綜理之周足任大事癸亥歲
再疏自陳 上允致仕初郡城陷士夫多避亂徙居
會省公因僑寓嘉禾越四年還莆乃丁卯歲也公歸
觀邑里蕭條愴然流涕因捐俸賙給族黨暇與司空
林端簡公及同輩年七十以上結社爲樂或擬之香

山九老公先以子一俊除由加恩進階資政大夫後
兩奉恩詔進資德大夫正治上卿及卒撫按請卹典
上遣官諭祭者再命有司爲治兆域年八十公質
實醇厚不事表暴雅有前輩風致每痛二親不逮養
繪風木圖自隨縉紳學士多爲歌咏蓋悲其志云在
館時壁上書學林二字或問之曰肖泉林君吾所不
及也予自信迂拙性尤寡諧公奚取於予哉公喜吟
咏著述甚富後萃爲一帙名礪峰集

南京工部尚書新昌呂公光洵行狀

張元林

公諱光洵字信卿紹興之新昌人邈其始實爲周太公望其居新昌則自宋大理評事諱億者始十一傳而爲贈按察僉事存正存正生樂樂生旌士廷圭及廷安廷安無子以廷圭子世良爲子自世良公而上至廷安廷圭兩公皆得贈及移贈尚書右都御史妣皆夫人而世良公者公父也當嘉靖壬辰間甫踰冠公已成進士知崇安崇安一女子中崇其縣中豪舞訟者欲以覘公教其父持一紙倉卒訟崇鬼於公公

徐牧其紙曰且夕暮易草移城隍所明夕崇來謂女
曰何至是我且去霜降後復來耳至霜月果丁章夫
人憂服闋補溧陽臺使者行縣饌羹偶垢墨使者疑
有毒公馳往取羹對使者立啜盡一器使者悟爲起
謝在溧三年召入補御史 肅皇帝南巡大學士某
居守增設員已外至千人公奏罷之又奏河東薛瑄
崇仁吳與弼新會陳獻章三賢者不宜不在孔子廟
庭十九年地震則又奏九邊中有大闕統凡十事不
宜不補馬倒死不宜獨責廝養卒最不宜者令芻地
漁入倖戚貴家官僚係儲本不宜使非其人其人矣

又不宜不重其禮貌如是者凡十餘奏並要切綱諱
忌遂出領南直隸蘇松常鎮四府巡按事蘇松澤國
苦水劇無善計吏後先孔塞亦無息期公總醜有法
水效職至今工罷輒譜畫冊書可千百年不虞滅沒
奏入 肅皇帝嘉之賜金綺又奏免早租六十萬餘
用餘皇破海寇大洋中罷覆刷陳牘省費無算再賜
金綺增俸二級代入會虜入古北口過京師與故侯
驚爭馬市不可一日章十三上謂虜驕易與且都城
何地也可使還以歸邪今日臣有死無和有進戰無
退守 上覽疏爲動色公亦自掖馳歸托其母夫人

姑婦間於所善欲以身死 國會虜退而止遷南京

光祿寺少卿改北丁贈公憂起補更太僕大理二寺

少卿俄復改南如舊職徙尹應天諸輸府者用富民

費常倍徙公易民以官民相率俎豆公徙南大理卿

會南卒以餉不繼殺戶侍郎乃擢公副都御史董餉

事尋改南工右侍郎又進北工左公督餉則卒馴帖

用工則商又俎豆公如尹時用工於北則大橋成加

二品俸於是癸亥間滇事漸痺砭者鮮效舉朝則交

舉公公遂從工左侍遷右都御史以繡斧往蒞滇至

則首軍昆陽斬叛酋馬苴李應朝昆陽平明年春水

西宣慰安國亨寇霑益夏李向陽方廷美反昆陽虧
遮者索反尋甸公並後先討平之事聞晉兵部尚書
兼如故而武定府土酋鳳繼祖者世毒螫鈞連他府
小大酋寮濟蠱者數十輩遠至川貴相婚姻有衆數
萬地千里據城以叛數出諸蠻攻城郭殺憲臣於軍
用僞王南面其衆意卑眇向者麓川然孛願始沐氏
數莊豪而兵符故專沐氏公表其繇併乞符得自調
賊倚川貴爲三窟計其敗遁必從貴走川乞稍借得
暫領川貴諸兵道禪帥賊果用是敗遁竟受首於川
武定平悉有其地沐氏旣銜公抑其權又恚當公未

表時頰却其寶賂及得賊又追論其左袒賊若莊豪
激叛與叛者諸陰事痛一剪束而公自軍興則先子
首屢譯琫捧符以奉軍約無一日不寄首領於象馬
間移按沐氏黨則用先子假按察長把三尺提一寸
狸兔爲鷹鷂擊鳥雀以誅君惡於棘栢之署以故堅
重者則得謗稍改工書以歸而眇微無所根柢若先
子則交擊以蒙遠公重則用數十薦而不起先子眇
微則脫丁贖得復齒士林稍烏素其顛軀而已矣於
是兩翁者痛既定追灼而悸數往來鏡湖天姥間相
約彼廬而此舟幸長有林泉以準換苦逸意造物未

必弁此奪之俄而鏡湖館寂矣壬午距庚辰幾何哉
而天姥巖巒又遽報黠惻噫此吾所以狀之日為慟
移晷三擲筆而未成也公自入仕仕靡不優而為御
史巡吳為部院長治澳勞最著自結髮為學學靡不
優而中治新建自再後與餘姚錢刑部德洪山陰王
兵部畿武進唐都院順之三先生相切摩最力以故
悅親取友諸倫教事率謹篤如古人在澳方盛晉賞
輒辭賞乞歸得大臣體他若好捐賑為鄉里作福田
游精翰藻芳華明映人所難然不足為公詳也

南京工部尚書徐公養正傳

郭棻

徐養正字吉大號蒙泉柳州衛人嘉靖辛丑進士讀書中秘授禮科給事改戶右劾嚴世蕃奸狀嵩怒矯旨廷杖七十謫滇之通海典史量移肇慶府推官歷陞貴州提學僉事丁外艱服闋補雲南規條嚴肅集諸生於五華書院教以忠孝大節時徐波石死事沅江公購得其首寘之法撫按多公有經世略冢宰李古冲稱公爲吳東湖霍渭厓之流擢南光祿少卿丁巳轉尚寶卿己未丐歸壬戌嵩逐世蕃磔公起爲南通叅尋遷右通政甲子轉南光祿卿革弊興利內使

戒不敢橫乙丑轉南戶侍申明部運規則丙寅晉戶
部左侍郎遇 上登極恩三代擢南大司空丁內艱
承論祭葬服闋撫按會薦 朝宁側席忽遘疾一夕
自云真西山先生至起迎之揖讓而卒顏色弗少變
蓋公深有得於主靜之學不以死生利害動其心其
生平德性溫然可親而直節勁氣又浩然不可挫也
家居常却汗令二千金之餽嚼然涅而不緇所著姓
鳴集若干卷子秋鷄舉進士官福建按察副使

南京工部尚書嵩麓魏公尚純行狀

張鼎文

魏氏自漢丞相相居濟南定陶徙平陵至元忠知古
暮代著顯績世居山東國初諱保者 太祖兵至歸
附永樂初功陞燕山右衛百戶始居京師保生能通
能爲能通生與與錦衣衛校尉生宗興成化間從

徽王之國遂爲禹州人宗號南洲遵道服義嚴峻有
識王性驕縱宗抹惡補過有陰德壽八十九終生丈
夫子四長尚經引禮舍人次尚綸山西按察副使號
東麓私諡孝恪先生治伏氏書嘉靖初爲諸生兩河

人才推冠冕焉公稟學孝恪雅志精敏讀書長春觀
兄弟自相師友朋執罕見其面辛卯河南鄉試考恪
以書經領解名第二公解禮記卷第二壬辰進士連
捷觀刑部政除行人始釋褐卽以清節自厲奉詔祭
葬 瀋王 崇王交際不通致命而已轉行人司副
陞戶部四川司署員外郎詔往浙江督餉歲暮不宿
于家會計詳明軍民威服尚書梁公慎於用人以太
倉銀庫久生物議遲公江南回卽以屬之公移寓庫
側寅入酉出風雨不阻氣散滯弊卽積用瑣格通明
以示不疑翠華南狩公居待選 邗天恩得實

授員外郎戊戌孝恪舉進士公陞福建司署郎中並
馬京朝人稱聯璧尋出爲陝西布政司左叅議關內
關西兩分守缺人而關內爲要監司意寓軒輊以公
守關內同官忌之盤屋豪宦爲橫人莫能制公舉法
繩之其姻戚顯要者頗憾公及鄉試內簾乏人公獨
以文章權衡自任一時西方之俊甄拔無遺苑洛韓
公於文最新許可讀公程文斂容歎服陞湖廣按察
副使風稜峻甚麻城張老虎殺人匿尸流渠中獄疑
不決公推問立得其尸天暑不腐人以爲神入賀

聖壽悉却屬官贖太保徐存齋時爲少冢宰苑洛謂

曰此公才節苟得三四輩天下不足爲矣徐公因訪以時事聽公舉論一一識之考績之日陰用公言然而關內忌公蓋匡憾公者亦於此時併力排擠徐公知其私也擬調用以紓其憤時相父子納賄無忌公不往謂補貴州按察副使奔命萬里而益播風猷守法持正土夷安氏騷擾地方殺傷人數歲獄不決公欲以內地法治之俄丁張宜人憂土夷喜曰吾聞魏公健甚今不來矣服闋補陝西行太僕寺卿頃之卽其省遷右叅政轉山西按察使總執刑柄綱維大張太原人有滯獄卽日出之平遙盜劫掠尅期獲之越

歲陞山西右布政使丁南洲公憂服闋補陝西右布政使署篆三月宿弊盡去羨餘千金悉付籍記或謂公矯前失而難後繼公一笑而已轉山西左布政使錢穀多侵漁久而乾沒甚公令出者內者必自滿其意無有後言乃已邊儲已足不復罰紙吏役雖多不許納班旣陞應天府尹方欲爲留梃修廢墜之政而改尹順天順天尹主寬大素少關防公肅以憲度吏屬重足而立府治前有樓主人謀苦罪犯冬浸夏焚人指其處號鬼門關公遇獄到隨遣使無留宿虜入自箝子嶺直犯通州蹂躪畿內虜退公請發內帑以

版殺掠獨賦役以寬傷殘已而遷右副都御史巡撫
保定公素有屏疾又有指山西時事議之者公決意
求退前後七疏特旨留公吏部咨慰勉不已公臥病
恒山拊循六郡首重防春設守以內修備戰以外擴
築城堡繕器械添奇兵練士馬雄邊威敵之具畢力
以陳又考求卒乘遺法教演戎車聚則爲城行則爲
陣邇代無行之者方議巡行邊朔周覽要害以竟伏
波之志不虞劇病予告而歸閉門習靜課農教子風
日佳時與仲兄季弟肩隨尋樂俄而孝恪公暴卒公
仰天長號無異考妣撫二孤無異已子經理兄喪自

始槩至掩坎皆出私橐報孝恪之教也疾漸愈忽復起用補大理寺卿公感知已之恩憐然行抵柁門

先皇帝棄羣臣公未入朝僦居民舍私爲哭臨 今

上嗣曆始就大理數月轉工部左侍郎奉命督理太倉工役護送 先皇帝梓宮永陵回賜白金紵絲表

粟膏疾復作疎乞致仕 上弗允且陞公南京工部

尚書時大學士高公中玄以文高氣直與同相不協公素爲同相所愛而又與高公同鄉習觥交厚至是不附同相一意歸老言官又於此時追論舊謗 上

特旨留公且行且辭抵家再辭乃得優詔許致仕卽

首勅先祠修葺殫薪次葺治先塋益樹松楸謝絕朋
遊疎邊守令惟文士談詩醫工製藥酒樽棋局曳杖
逍遙推運達命無復外慕會 朝廷纂修 先皇帝

實錄遣使檄取郡縣大臣行事有關政體者上列史
館公手錄數事付之詩文奏疏若干卷疾甚盡燔之
不存公歷官三十七年一十九任家無餘貲嘗欲於
宅西葺園闢小院蒔菊苗以娛暮齒卒不克遂性通
音樂絲竹在御寄興而已疾甚時從王家借小胡牀
指其背見上有畫龍達命却去內子蒙以撲終不肯
用疾革危坐不言家政見友生與醫者在前命麾之

出言訖而瞑其服方之性至死不變如此

南京工部尚書常熟徐公拭墓志銘

張元林

上御極之九年冬兩京工部尚書常熟徐公卒於家
守臣以聞 上念公舊勞賜祭葬如令甲公諱拭字
世寅別號鳳竹父曰天民母曰吳淑人公生四年而
吳淑人歿繼母張淑人又十年而父歿公辟踊皆如
成人禮服除明年補邑弟子員又明年入太學公生
有大志素豪宕自喜與人談當世務輒抵掌慷慨思
一見其奇人亦以是奇之以丙午丁未連舉進士授
宜春令宜春故相嵩籍也蒼頭千餘橫行往往持令

公心欲要東之乃卽席白嵩請其主計者姓名曰恐有狐假爲威者時世番佐席變色屬酒嵩曰公久之曰徐君言是立書二蒼頭名示公公至橫如故或佞就公公佯以爲非真悉笞之曰若曹姓名吾久已得之若非相國僕也且相國僕亦何敢抗令於是嚴父子心銜公而紉于書名故稍迹怨之且公治行最著無可螫者乃竟得召拜南御史而京山王公宗茂者亦以拜御史之南行間嚴盛爲祖且窮極珍異王間不能識以問公公應聲曰此海外珍羞也嚴聞而惡之已王御史至南卽草疏發嚴奸狀公實與聞之一

部郎遽以報嵩嵩得預爲地比疏至則又有珍羞輜
輳語乃逐王速邑且切齒公矣亡何嵩所私趙文華
者備倭南中倭未靖驟晉本兵時公方奏績還留日
及流賊立疏劾文華懼復求出鎮以自解於是文華
與嵩父子日夜欲甘心於公遂因風霾大計請公溯
江布政司都事淵故文華坐餽地也公至入謁文華
故怒它吏以懼公公弗爲動遂檄公使入賊巢將籍
手焉公立馳請未至而賊解當是時公日與嚴相抗
且遭貶斥矣而當路者又日訶公以說於嚴人人爲
公危公乃獨往持益力已量移司理建寧尋遷同知

饒禱雨雨應拜火火滅一時詩歌之有饒陽雙異集
入之擢湖江按察僉事公至湖受命監威將軍軍討
流賊在軍多所指授賊平賜鐵幣時分宜已去位矣
尋擢右參議仍守湖踰月而丁張淑人憂既公除卽
以前官起補河南旋晉湖廣按察副使督學校精於
藻鑑而秉法公嚴楚人士至今稱之又幾年擢雲南
叅政已復晉按察使時黔國席世寵跋扈囚繫其孀
嫂屢抗旨不遵都御史御史先後列其罪猶不悅公
乃爲計身革爵聽勘以陽解其權而姑令其子署專
以陰安其心於是黔國斂手聽命而公名籍甚矣公

在滇六年乃調山東布政 以時新鄭再起以異華亭
故斥逐南人獨計公有士望又華亭鄉人乃不為華
亭所亟用遂擢公尹順天尋晉右副都御史撫江右
欲以結公而公實不義新鄭所為給事筮者新鄭鷹
犬也以心疾去疾愈冀復起新鄭私於公御史且以
檄要共薦公謬曰筮病寔未愈筮聞立馳見公又謬
為謾語勞之若不會其指者於是新鄭怒方謀逐公
而新鄭遽削籍去公乃得免花園洞賊自正德來嘯
集蟠處為江右患當事懼為難首習事招撫苟幸旦
夕無事公奮曰養寇如民何立調兵平之捷聞賜銀

幣如制公在江右壹意務節省稍有冗費輒掣蹙曰
此秋毫皆民脂膏也而諸所建議如請表革除諸忠
臣請崇祀羅豫章師弟及王新建請復臨德二倉積
儲則皆古今大義宗國至計也踰幾年擢南少司空
時黃河東決漕道爲梗 上南顧太息宰臣以下咸
蒿目焦心思所以別爲計而南大司空濟南劉公者
熟登萊事公亦諳習海道心然其言遂竝疏上計
上報可俾劉尚書往視而公則以少司空兼僉都御
史專勅理膠河會山東當事者言開膠河非便所役
夫且乏餉而羣譁言不便者交和之遂從中報罷鳴

呼膠萊豈必不可成之役哉今其疏具在後有尋故
迹者當知公今日苦心耳公既罷膠河役卽以少司
馬僉都移撫瀋瀋以西濱海舊有塘當海鹽捍之歲
久圯嚙甚前是盲風怪濤驟作衝決數百里浮尸如
蟻損禾稼什九民死徙無算公至則愀然亟圖之或
危公曰塘日夕與海爭道易圯難固且動則肘掣公
不傷於河乎柰何復言海公不聽經始益力相地宜
謹願慮庀石鳩工其縱橫廣厚一以意裁而授之無
不立就者不浹歲而功成巨隄虹亘狂瀾鯉披濱海
諸大郡幾數千里皆化沮洳爲膏沃桑麻蔽野流徒

復歸公此舉為濶西百世之利豈虛語哉夫自古善
議者不必善成公嘗議河矣乃其功奪於河而竟成
於海則公豈喜事而空譚者乎以此徵膠河非必不
可成者也遇然耳海塘既成時又有馘倭之捷得併
叙然厓獲鎡幣之賜又復如濶功鉅而薄賞則尚從
膠河之左議也濶俗華靡又官府徵科無常法吏緣
為奸 今皇帝大婚遣中貴督造袞綺工料倍昔間
閭驟困公酌議調停身以儉先一切節省如江右立
三辦法俾租調有定額又奏請得戶工二部接濟銀
二萬有奇由是俗漸向樸而民亦大蘇是年晉少司

寇未蒞復晉南大司空時江陵以奪情怒言者公與
平湖陸公光祖皆其同年並上書規之江陵不悛承
指者遂用膠河事中公公罷歸而名益重直指按部
輒首疏薦公廷議且以南大司寇起公而公溘然逝
矣惜哉

資政大夫太子太保南京工部尚書龍潭葉公

夢熊神道碑

王弘誨

予讀漢功臣表所區別五等勲庸大抵非常之士抱命世王佐之略其生也有所自其出也有所爲故遭時遇主隨試輒效功施社稷而名炳旂常非苟而已也若吾鄉太保葉公殆其人與公諱夢熊字男兆別號龍潭惠之歸善人也生有異徵頭骨隆然起雙眸炯炯如電少從里中兒嬉遊卽豪舉號召羣兒惟命間育鷹犬爲戲立幟分部伍鷹犬皆馴服識者已知其非凡年十二侍父宦邸授書過目成誦十六入庠

序遂知性命之學負笈南海何宗伯端恪公門端恪
公大奇之一日讀書西湖遇異人往來傳秘密世莫
知者臨化留衣爲別謂公勲業當代無兩嘉靖辛酉
以尚書魁于鄉乙丑成進士令福清以廉能卓異徵
拜戶部主事改監察御史居臺三月所論列皆 國
家大政侃侃無所避會虜酋俺答以其孫亡入關中
舐犢愛乞款請封貢公抗疏不宜許致忤當事者意
幾杖尋謫丞陝之邵陽者二年量移歸德推官遷南
戶部主事督理鳳陽倉裁羨額絕侵漁歲省數萬萬
曆甲戌轉郎中遷贛州知府肅清羣屬罷關市無名

之征郡有巨盜葉楷葉柱者聚黨安遠山中前守不能制公謀之督府江公既合乃密購楷柱所厚善者令召楷黨復因楷黨之來歸者令召楷所親任推赤示之令入楷巢穴中間離其衆楷腹心內潰不知也竟帥萬餘人反公率兵深入急擊之楷衆倒戈內向遂滅斬楷禽其餘黨以其地設長寧縣治百姓就所在祠祀公而監司中有忌公功者會賴推官以履畝深入賊巢爲餘黨十四人所脅將乘此中公公以計盡誅此十四人而賴幸無它尋丁內艱歸苦茨中猶出奇俘楷黨賴玉讚致之軍門閩境晏然疏聞 詔

賜金幣服除起補安慶府會有弓田之令上下一切
以苛刻爲能公崇寬大務從民便致緩期奪俸不顧
歲大旱公禱雨立應百姓建留雲亭以志德又計轉
潛邑天堂巨寇上最荷 聖書旌異贈父爵如公官
母稱恭人壬午陞雲南副使未上改浙江海道公至
周視形勝悉召境內兵益以海艦令寇至敵于外無
俾闌入海波息警會有 詔求邊才臺省交章薦公
謂永平兵備公治兵能用間又能因敵間爲我用復
以間用間輟轉于不窮之算所制輕車神礮尤精一
試遼東虜披靡當事者上聞下其式于九邊仍 溫

旨慰勞加右參政適鄰部士卒鼓噪公丙夜馳定之
卽咸受約束無敢譁者丙戌大計舉廉能第一居三
年長昂不敢窺邊尋推山東按察使晉右轄已陞都
察院右僉都御史巡撫貴州兼督川東湖北節制三
省故事各撫按以幣交皆取償公費公獄命典謁互
易其幣以報舊習一洗草坪苗殺一千戶倡亂公立
筭殲其首惡事聞再下兵部紀錄土舍楊應龍驕蹇
縱恣多不法公力欲除之而兩省異議應龍竟逋誅
至今爲梗談者始服公先見公又念貴竹咸土司難
馴請增新貴縣治民用帖然庚寅陝西中火酋調公

撫陝會與經略尚書和戰異意公畫不得展然猶密遣將擊走火酋莽刺工川之衆倡一時收戰氣辛卯擢副都御史撫甘肅威名日盛松虜套虜及海西諸虜遠遁而壬辰遂有寧夏之烈初寧夏呼拜呼承恩劉東陽等皆戍卒自恃家丁強衆又虜方黠悍而邊備素單弱遂決計勾虜叛逞戕撫臣脅宗室虐酸張甚公洒泣上疏願捐身討賊得旨趨寧夏入靈州虜數萬騎突至公命驍將麻貴等出其不意破之虜復以叛賊召傅城北門公率兵搏戰城下士殊死入其陣虜大挫遁賊失援喪胆然猶堅壁以拒我師

朝廷憤師久無功下封侯之賞賜上方劍俾當事者
得專決尋速總督魏公而以公代公召將士激勸之
示之劍士人人競奮晝夜蟻城決水灌城公親冒矢
石督戰用神礮燔其樓櫓擊破卜着二虜酋援賊者
賊意氣沮喪公益耀舟師震賊而間貽蠟書以移其
黨俾爲內應某日遂以神礮克南關百道攻擊承恩
等懼不知所爲斬劉東陽許朝土文秀自首行成不
聽益進兵攻之礮連發如震呼聲動天地哮拜自焚
賊之俘承恩承寵傳首九邊捷上朝野大慶公一切
推功前督臣魏公及諸將之敢戰者論定擢公右都

御史廕一子錦衣正千戶世襲公請移鎮還因原休
兵偃甲未幾疏乞骸骨乙未吏部疏修舉邊功陞公
兵部尚書廕一子胄監予憶往昔與公談鄉先達安
攘之烈至大司馬翁襄毅公心艷慕之每竊以歸公
而公遜謝不居今公勲秩駸駸出襄毅上惟是贈諡
大典尚有所待總之日久論定皆所謂先後若合符
節者也公與襄毅俱產嶺東詩有之維嶽降神生甫
及申有以也夫

焦太史編輯國朝獻徵錄卷之五十二終